

ASO LULU, 25 OKETOPA 2023

Na nofoia e le Fofoga Fetalai le Nofoa i le itula e 9:34.

Tatalo.

FOFOGA FETALAI: Ou te faasilasila atu ua amatalia nei Taualumaga a le Fono Aoao Faitulafono.

E tusa ai o tulaga aloaia ou te mua'i faatalofa atu ai i lenei taeao fou i le maualuga o le tatou Maota, i le afio o lau Afioga i le Taitai o le Malo, lau Afioga i le Tamaitai Palemia, afio foi lau Afioga i le Sui Palemia ae a outou Afioga i Minisita o le Kapeneta, ia faapea foi outou Afioga i Minisita Lagolago.

Lea foi itu i le afio o lau Afioga i le Sui Taitai o le Itu Agai ma le mamalu o sui usufono uma o le tatou Palemene.

E faapea foi le afifio mai o Ofisa Sili o Pulega o Matagaluega ma Faalapotopotoga Tumaoti o le tatou Malo ma le mamalu o nisi o le atunuu ua tatou mafuta faatasi i lenei taeao, faamalo le soifua manuia ma le lagi e mama. E i ai le talitonuga e le o tuulafoaina le alofaiva o le Palemene i tapuaiga mamalu a Lana Afioga i Le Ao o le Malo ma Lana Masiofo, Sui Tofia ma lona Faletua, le Faamasino Sili ma le mamalu o lea Itutino Fefaatauagai o le tatou Malo.

Ae faapea foi le paia o le aufaigaluega tofofi a le Atua mo Lana Talalelei i so o se fatafaitaulaga, Samoa o lo o faafofoga tapuai mai i so o se tafa o le lalolagi, o paia lava e le avea aua Aiga ma latou Tama, Tama foi ma o latou Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti. E faatalofa atu lau Palemene i lenei taeao.

Le tapuaiga a nai o tatou uso i Sasae, lau Afioga i le Kovana Sili ma le Lutena Kovana, le Peresetene ma le Maota maualuga, Fofoga Fetalai ma sui usufono mamalu uma o le Maota o Sui, o mamalu e le tau faafuluina. E matou te faatalofa atu i lenei taeao.

O lea o le a sii le Sa o le tatou Maota i le vasa aua felafolafoaiga i lenei taeao. O le tatalo a le Fofoga Fetalai ia tafatafafuga e le Atua lo outou finagalo, tatou saili i Lona filemu e maua ai malo mo se ai o le tapuaiga a Samoa a o sona viiga ia sili lea i lo tatou valaauina.

Manuia le usugafono a lau Afioga i le Tamaitai Palemia ma lau Kapeneta filifilia, manuia foi le usugafono a sui usufono mamalu uma o le Palemene, manuia le tapuai mai a Samoa.

ISI FAASILASILAGA A LE FOFOGA FETALAI

FOFOGA FETALAI: Mo le silafia e le mamalu o le Palemene, o lena ua tufatufaina atu i luga o a outou Laulau kopi o le Tusi o Lafo ma Tualumaga o le Fono Aoaofaitulafono mo le vaitaimi e afua mai i le aso 3 Me 2022 seia oo i le aso 16 Mati 2023, e tusa ai ma aiaiga o Tulafono Tumau.

TUUINA ATU O PEPA

Na tolaulauina e le Failautusi i le Fono Aoaofaitulafono o Pepa e tusa ai ma T.T.49(2).

1. P.P.2023/2024 Nu.53, Lipoti o le Usugafono a le Palemene o Samoa i le Fonotaga Lona 66 a Palemene a Malo o le Taupulega, na usuia i Accra, Ghana i Aferika 30 Setema – 5 Oketopa 2023;
2. P.P.2023/2024, Nu.61, Tali a le Malo i le P.P.2022/2023 Nu.123, Lipoti a le Komiti o le Vaega o Atinae Esee i le P.P.2021/2022, Nu.7 & P.P. 2022/2023 Nu.27, Lipoti Faaletausaga a le Auaunaga o Vaa a Samoa mo Tausaga Faaletupe 2019/2020 & 2020/2021;
3. P.P.2023/2024, Nu.62, Tali a le Malo i le P.P.2022/2023 Nu.98, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2020/2021, Nu.70 & P.P. 2021/2022 Nu.48, Lipoti Faaletausaga a le Matagaluega a le Palemia ma le Kapeneta mo Tausaga Faaletupe 2019/2020 & 2020/2021;
4. P.P.2023/2024, Nu.63, Tali a le Malo i le P.P.2022/2023 Nu.65, Lipoti a le Komiti o le Vaega Tau le Va Fealoai i le P.P.2020/2021, Nu. 72 & P.P.2021/2022 Nu.59, Lipoti Faaletausaga a le Pulega o Tineimu ma Faalavelave Faafuasei a Samoa mo Tausaga Faaletupe 2019/2020 & 2020/2021;
5. P.P.2023/2024, Nu.64, Tali a le Malo i le P.P.2022/2023 Nu.158, Lipoti a le Komiti o le Vaega Tau le Tamaoaiga i le P.P.2022/2023, Nu.89, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga Faaletupe 2021/2022;
6. P.P.2023/2024, Nu.65, Tali a le Malo i le P.P.2022/2023 Nu.154, Lipoti a le Komiti o le Vaega Tau le Va Fealoai i le P.P.2022/2023, Nu.50, Lipoti Faaletausaga a le Iunivesite Aoaofaitulafono o Samoa mo le Tausaga Faaletupe 2021/2022.

Male faaloalo lau Afioga.

ILOILOGA O LIPOTI A KOMITI FAA-PALEMENE

P.P.2023/2024 NU.49, LIPOTI A LE KOMITI O TULAFONO TUMAU, MATAUPU TAU FAIGA PALOTA, TALOSAGA MA TOFIGA FAALE-FAAVAE I LE P.P.2023/2024 NU.37, LIPOTI A LE KOMISI SUESUE O LE FAIGA PALOTA 2021, FEPUARI 2023 - ILOILOGA

FOFOGA FETALAI: Ua maea ona ou faasilasila aloaia i le aso Fono ananafi, o le taeao nei o le a amata felafolafoa'i ai lo tatou Maota i le Lipoti lenei. E i ai le talitonuga, ua lava avanoa sa tuuina atu e silasila ai a outou Afioga i le Lipoti mo le tapenaina o finagalo e ala i a outou saunoaga.

O le avanoa lenei ou te tapa ai lau Afioga i le Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae mo le folasia o la outou Lipoti. Lau Afioga i le Taitaifono.

Afioga AUUAPAAU MULIPOLA ALOITAFUA MULIPOLA (Taitaifono, Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae): Lau Afioga i le Fofoga Fetalai, ou te faatu le lafo, *Ina ia faamaonia e le Fono Aoa le Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le Lipoti a le Komisi Suesue o Faiga Palota 2021, o lo o tuuina atu ai ana Sailiiliga ma ana Fautuaga.*

Faaluaina e le sui usufono mo Faleata 1 ma le sui usufono mo Gagaifomauga 2.

FOFOGA FETALAI: Tulai mai lau Afioga i le Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae mo le tolaulauina o Sailiiliga, Fautuaga ma Iugafono a la outou Komiti.

Tulai mai lau Afioga i le Taitaifono.

Afioga AUUAPAAU MULIPOLA ALOITAFUA MULIPOLA: Lau Afioga i le Fofoga Fetalai, ou te folasia i luma o le Palemene le Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae mo le silafia e lenei Maota ma le faafofoga tapuai mai a Samoa, ma e faapea:-

O le Atua o le Alii lea, ua na faamalamalama mai ia te i tatou ina noanoa ia i maea le taulaga ia o'o i nifo o le fatafaitaulaga.

Lau Afioga i le Fofoga Fetalai, ou te manatu o lea ua mapu'e le laumea i le vasa ina ua faalepa le Sa o Tautaialii ina ua laolao foi le vasa nai asuisui. Ta te tu i le lilifa o vanu ma solia siupapa, i le taaligoligoa ai o le Maota nei ina ua nofoia sua ma auoloolo. Ou te le toe aufagaina foi la le niuloa ua malie matamemea le aniva nai le aopouli a o faatiliilao lau tifa o le moana.

Lau Afioga i le Fofoga Fetalai, o moomooga e le mamae ma le olioli e le faoa ina ua e momoli mea i faletui ma le utugataufa i le Atua i lenei taeao, faamalo faafetai, ta seelua ia i lou sa. Ae o le a tauvaa ia ma le gatete aua ua soua lotolau, ae o le ala foi lea e se'e lili'a ai tautai o le gataifale pe a o'ina fati sisina auma o aau nei fatia i ulugalua pe maluia i uluafu.

Lau Afioga i le Fofoga Fetalai, tau lava ona ou afe ane i le tapuaiga a Samoa i lenei taeao. E faatalofa atu i le faa-Ao o lenei Palemene, lau Afioga i Le Ao Mamalu o le Malo ma lau Masiofo, le Sui o le Fono a Sui Tofia ma lou Faletua, le Faamasino Sili ma le Peresetene o Faamasinoga o Fanua ma Suafa ma le mamalu o le Faamasinoga e atoa i ai Itu Fefaatauagai o le Malo o Samoa.

E le faagaloina le faliu atu o le faatalofa i le Faigamalo a nai o tatou uso i Tutuila ma Manua, le afio o lau Afioga i le Kovana Sili, le Lutena Kovana, le Peresetene, le Fofoga Fetalai ma Sui o Maota e Lua. O le paia aua Sua ma le Vaifanua, Fofu ma Aitulagi, Saole ma Saleaamua ma le Launiu na Saelua. Afifio foi le Motusa, le Laau na Amotasi, Faatui o le Motu, Tootoo o le Faleula, Faleula Tautagata ma le Faleula Tauaitu ma le mamalu ia te oe le Manu'atele.

E faamulia'i le faatalofa atu ae ua ao i ai le mamalu o le atunuu i lo outou ituvai o le Talalelei, e faatalofa atu i la outou galuega e le tuu taimiina aua la outou faanonogamanu i le Atua mo Samoa ma le lalolagi atoa. E faatalofa atu foi i so o se Samoa o maua mai Tualumaga a le Fonousu a lau Palemene i lenei taeao.

Lau Afioga i le Fofoga Fetalai, ou te tulai atu se i tolaulau Sailiiliga, o ni Teuteuga ma Fautuaga a le Komiti lenei e tusa ai o le Lipoti a le Komisi Suesue o le Faiga Palota 2021 P.P.2023/2024 Nu.37.

Talu ai lau Afioga ona o le tele ma le mafiafia o lenei Lipoti, ae o le tele o latou fautuaga na tuuina mai, o le ala lea o le a ou taumafai ai lau Afioga i se auala faafaigofie e faaleo ai lenei Lipoti ona o lona natura e tasi i totonu o le 5 tausaga, ae manatu foi ua mafatotoga sui usufono mamalu uma o lenei Maota i le silasila i ai i le Lipoti a lenei Komiti, ina ua faataatia i le Laulau-a-Fono ma tuuina atu Lipoti ma kopi mo sui usufono o lenei Maota i le aso ananafi. A ia atagia foi i sau folasaga o tau faapuupuu atu le aano moni o a matou Sailiiliga, Teuteuga ma Fautuaga.

Lau Afioga i le Fofoga Fetalai, i le vaaiga aoatetele o le Lipoti lenei a le Komisi o Faiga Palota 2021, o le Palemene Lona XVII lenei e atoa i ai le 5 o Paeaiga talu ona faatuina se Komisi Suesue o Faiga Palota Aoao i le atunuu, ma o le 6 ai lenei o Komisi Suesue ua mafai ona faavaeina talu mai le tausaga 2001.

O Komisi Suesue e filifilia i le maea ai o Faiga Palota Aoao a le atunuu, ma o ona sui auai e tofia e ala i se Poloaiga a le Kapeneta. O le anoliu o le faavaeina o sea Komisi Suesue, ina ia toe iloilo ni luitau ma faafitauli na alia'e mai i le lumanai, o le taimi na faatino ai faatasi ai ma le tuanai o le Faiga Palota Aoao. E ao ai i sea Komisi Suesue ona lauliliu ni teuteuga e foia ai ni vaivaiga i le agai atu i le isi Faiga Palota o lumanai. O le tofia ai o se Komisi Suesue, ua i ai foi ma tuutuuga o galuega faatino e taialina ai iloiloga mai lea taimi i lea taimi.

I le Komisi Suesue la lenei o le Faiga Palota o le 2021, e lua lava vaega lautetele sa faavae ai ana galuega faatino pei ona faamaonia e le Kapeneta ua taua i lalo.

Muamua, lauliliu Tulafono e faatautaia ai Faiga Palota e afua mai i le taimi o le tutoatasi o Samoa ma faataoto mai ni teuteuga talafeagai mo le faafoeina o Faiga Palota i lelumanai.

Lua, auiliili mataupu ma luitau sa tulai mai i le Faiga Palota tele o le 2021.

Lau Afioga i le Fofoga Fetalai, i le mulimulitaia o Vaega Lautetele ua taua, na aiaia ai le silasila toto'a i mataupu tutoa nei:

- (i). Lola Palota.
- (ii). Sui Faipule Tamaitai po o Faipule Tamaitai.
- (iii). Itumalo Faaleaganuu.
- (iv). Agavaa o Sui Tauva.
- (v). Lesitala o Vaega Faaupufai.
- (vi). Soligatulafono o Faamasinoga.
- (vii). Palota mai o Tagata Samoa o aumau i Atunuu i Fafo.
- (viii). Sui o Vaega Faaupufai.
- (ix). Faatulagaina o le Ofisa o Faiga Palota.
- (x). Mataupu Lautele.

Lau Afioga i le Fofoga Fetalai, e le i faatamatama le silasila a le Komiti i le Lipoti lenei ina ua tuuina mai e iloilo, o le ala lea o le iloilo totoa o vaega uma sa faamauina ma lipotia mai i tusi mafiafia e tolu o lenei Lipoti, ua faataatia i luga o le Laulau-a-Fono a le Fono Aoao. E mafua i se a lau Afioga i le Fofoga Fetalai? O le faavaeina o le Komisi lenei e taua tele i le Palemene o mataupu o lo o agai e iloilo, aemaise o vaegatupe a le Malo ua faaalu i le faatupeina o vaegatupe.

I le matau a le Komiti o se tapenaga tele le Lipoti ua i lumamea nei, e tele foi se taimi o le Komisi na tapena ai e pei ona toe aiaia ai se taimi faaopoopo se i faamaea ai ana iloiloga. E ui i lea o le vaauga aoatetele a le Komiti, o se luitau tele le iloiloina o lenei Lipoti ona o le fesiligia pea o le moni ma le faamaoni o faamaumauga na lipotia mai ai e aofia ai vaega nei.

O le taunuuga o suesuega a le Komisi ua lipotia mai ai e le o le finagalo lea o le atunuu atoa, a ua na o se vaega toaitiiti na mafai ona faatalanoa i le taimi o ana iloiloga pe a fua i le faitauaofai tuulata mai o le atunuu lenei e 205,557. I lana Lipoti o lo o faamauina ai e na o le 2,175 le aofai o i latou na mafai ona soalaupule o latou finagalo, 687 o fanau i aoaoga maualuluga. E 31 Sui o Faalapotopotoga Tumaoti ma Matagaluega, ma le 1,457 o i latou ia na maua avanoa e malaga atu ai i nuu ma afioaga i tua e faatalanoa le Lipoti.

O fuainumera ma faamaumauga o Itumalo Palota o lo o faamauina i lana Lipoti, e feteenai fuainumera ma faamaumauga o lo o faamauina i le Lipoti a le Ofisa o Faiga Palota i le Faiga Palota Aoao o le 2021 lea sa avea ma (*P.P.2021/2022 Nu.47, Ofisa o le Komisi o Faiga Palota – Lipoti o le Faiga Palota Aoao 2021*). O le Lipoti lea ua maea ona iloiloina e le Komiti lenei ma ua tuuina atu lana Lipoti i le Fono Aoao i lana Fonotaga o le aso 20/12/2022,

ma e faataua tele fuainumera o le Lipoti lenei o Faiga Palota Aoa ona o le atoaga lea o lo o i le Ofisa o Faiga Palota.

Lau Afioga i le Fofoga Fetalai, o nisi o mataupu na ave i ai le faamamafa a le Komisi ma o lo o fautuaina, e le fesootai ma mataupu Tau Faiga Palota po o le faavaa o galuega faatino na aloaia e le Kapeneta. O se itu na fesiligia ai le mulimulitaia e faatinoga uma a le Komisi Suesue o le Tuutuuga o Galuega Faatino sa faataoto.

O lo o manino foi le mafuli o finagalo na faaalua i le teena o nisi o mataupu autu e le o atagia i ni fautuaga ua faatulai mai le teena o ni vaega seiavagana ai filifiliga ua fautuaina e silasila i ai le Fono Aoa lenei. O le leo o mau na folasia e taua tele mo le itu lea na tataua ona silasila i ai le Komisi, atonu o le itu lea ua tele ai Fautuaga na faatulai mai ua teena le faitauaofai o mau na folasia i luma o le Komiti lau Afioga.

E fesiligia pea le autasiga a Sui Usufono o le Komisi Suesue i lenei Lipoti, ona e le o mafai ona saina uma Sui filifiliga e pei ona tofia aloaia. O le itu lenei na fesiligia ai ma le mafuaaga, o le saina o Sui o le Komisi i le Folasaga amata a le Taitaifono.

I le tulai mai ai o nei feteenaiga ua fesiligia ai le fautuaina pea o lenei Komisi Suesue o Faiga Palota, pe le o le tiute ea lea o le Komiti lenei a le Palemene lau Afioga i le Fofoga Fetalai? E le tau faailo o lo o aiaia i Tulafono Tumau 171, o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae, e nafa ma le faatinoina o iloiloga o mataupu tau palota ma talosaga.

E ui o lea lau Afioga i le Fofoga Fetalai, o vaivaiga nei o le Lipoti a le Komisi na faaiugafonoina e le Komiti, le faaauau pea ona iloilo ina ona o le taua o taiala ma mataupu, na aiaia ai le Tuutuuga o ana Galuega Faatino.

Lau Afioga i le Fofoga Fetalai, ona ou see mai lea i Taualumaga o iloiloga. Na amata Taualumaga o le Fonotaga a le Komiti i le aso 26 Iulai 2023, ma o itutino nei na se i amatalia i ai le matou galuega.

Muamua, o le Komisi Suesue o le Faiga Palota 2021.

Lua, o le Komisi o le Komesina o le Faiga Palota po o le Ofisa o le Komesina o Faiga Palota.

Tolu, o le Ofisa o Fuainumera Faamauiina.

Fa, o le Sosaiete a Loia a Samoa.

Ma le lona lima, o le mamalu o sui usufono o le Maota Fono lenei.

Aotelega o Saililiga i le Lipoti:

E pei lava ona ou taua, ia o itu tetele ia na se i faatalanoaina e lenei Komiti. I le aotelega o saililiga a le Komiti e tusa ai ma molimau na mafai ona auai, ma folasia o latou finagalo i luma o le Komiti ma faamauiina ai o le faitauaofai o i latou na fulisia, e teena le Lipoti atoa a le Komisi Suesue, faatasi ma Fautuaga o lo o faatulai mai e pei ona iloilo ina, e ui ina faaali manino i ai e le Komiti o lo o mau le avanoa e mafai ai ona auiliili o latou finagalo i ni vaega taua o le Lipoti lenei. Peitai, o le tele lava o mau na agai mai luma o le Komiti na agai e teena le Lipoti atoa.

E tele mafuaaga e faavae i lo matou teena o lenei Lipoti e pei ona i ai nisi o itu taua lenei, e feteenai nisi o fautuaga na faatulai mai le Tulafono o Faiga Palota 2019, aemaise o le faatinoga o lo o i ai i le taimi lenei. O fautuaga o lo o faatulai mai le Lipoti a le Komisi, e le o le finagalo lea o le atunuu atoa, ae na o se vaega toaitiiti na mafai ona latou faatalanoa i le taimi o a latou iloiloga. O le tele o mataupu o lo o fautuaina e atagia ai le tele o nisi vaega o tupe faaalu a le Malo i le faatinoga aemaise o le feteenai o matafaioi o lo o faatino e nisi o Ofisa o le Malo i le taimi lenei. O nisi o fautuaga e le maua ai se nofo lelei o le atunuu pe a faatino ni teuteuga i Tulafono. O Tulafono o lo o faaaogaina i le taimi lenei faatoa pasia i le tausaga 2019 ma le 2020, ma o le taimi muamua lenei ua faaaogaina ai. O lona uiga, e le tatau ona vavevave i ai ni suiga mai le Komisi lenei.

E i ai fautuaga o lo o tuuina mai e le fesootai i mataupu tau Faiga Palota. O nisi o fuainumera o lo o faamauina i le Lipoti e feteenai ma faamaumauga a le Ofisa o Fuainumera Faamaumuina i le faitauaofai o tagata o le atunuu.

E ui i le fulisia o le faitauaofai o finagalo e teena le Lipoti ma fautuaga ua faatulai mai, ae na faamauina lava nisi o mau na latou talia nisi o fautuaga ona o le taua tele o ia mataupu. O nisi o ia mataupu na matua lagalaga ai finagalo o molimau ma ua auilili atu i fafo.

Lau Afioga i le Fofoga Fetalai, o le mataupu muamua na lagalaga ai nisi o finagalo o le mataupu lea i sui faipule tamaitai i le 10%. Na lagalaga finagalo o mau na mafai ona fofogaina i luma o le Komiti le mataupu lenei e pei ona faamauina i le Lipoti a le Komisi ia i latou sa faaleo o latou finagalo. E tele itu taua sa agai i ai manatu faaalua, ae na auga lava le agaga maua luga e faataua le auai o tamaitai i totonu o upufai o Malo. Ae ia silasila i se faiga e foia ai nei feteenaiga e toe tulai mai le lumanai.

Na lilifa finagalo i e na faatalanoaina aemaise o e na fesiligia le mataupu lenei sui faipule tamaitai e faaaogaina ai le 10%. Lau Afioga i le Fofoga Fetalai ma le mamalu o le Maota, mai le 398 o i latou na fesiligia i le mataupu lenei, e 240 i latou po o le 61% o lea fuainumera sa o latou teena le 10%. O le 20% o lea fuainumera e 398, na i ai lo latou agaga e amanaia pea tamaitai i le Palemene i le faaaogaina o le 10%. O le 18 o i latou o lo o faapea mai i le Lipoti o sui tamaitai ina ia mafai ona fai i ai se isi faiga i le 10% lenei.

O lona lua o mataupu na lauliliu pea i ai le taua, o itumalo faaleaganuu ma itumalo faapalota. Lau Afioga i le Fofoga Fetalai, tasi lea vaega na mafuli i ai le faatalanoaga a le Komiti lenei ma felafolafoai ai finagalo o le atunuu lenei.

Mataupu e 3, o agavaa o sui tauva a o sauni atu i le palota. E le i faigofie i le Komiti le fetuunaiga o finagalo i le tele o mau e faavae ai le agavaa o sui tauva.

Mataupu e 4, o le aloaia o pulega mamalu faaleaganuu i upufai o Samoa.

Lau Afioga i le Fofoga Fetalai, o mataupu ogaoga ia sa mafuli i ai le talanoa a le Komiti lenei ma ni mau na tuuina mai i luma o le Komiti.

Ona matou oo mai lea lau Afioga i le Fofoga Fetalai i oototoga o fautuaga a le Komisi lenei na o latou fautua mai ai i le Kapeneta ae faui mai i le Lipoti i le Komiti lenei ua matou galulue ai. I le mau atoa ma le matau a outou Afioga,

e lelei ona outou tagai i fautuaga o le a faanumera atu ona tuu atu i ai lea ma le fautuaga a le Komiti ona mapo lea o la outou silasila i le Lipoti.

Fautuaga 4.2.1 o lo o taua i le Lipoti a le Komisi e faatatau i Tofiga Taualoa ma Faigamalo Lelei. O le anoliu o le vaega lea o le latou fautuaga, ina ia aloaia pea le 45 aso o le faatautoga e tusa ai o le Vaega 52 o le Faavae. Ma le maota o Tumua ma Pule ina ia fausia se maota o Tumua ma Pule e to'a i ai le atunuu pe a toe tulai mai ni faafitauli.

Ua teena le fautuaga a le Komisi lenei e le Komiti lenei.

O le vaega o le toe faatulai mai, ona o le fesili lenei sa ave i le Pelepesite i le 1990. O le manatu lea ua manatu ai le Komiti lenei, sa teena le fesili lenei i le vaitaimi lea o le 1990. Ua faatumauina ai foi le finagalo o le Komiti e faapea foi ona le talia e le Komiti le toe faatu o se maota lenei. Ona e le gata lea na silia i le 45 aso foi, e tusa ai o le Vaega 52 o le Faavae, e i ai le talitonuga o lo o i ai lava le Faavae, peitai ona o le feseeseaiga o upufai, o le Vaega Faaupufai a o lo o mau pea ma mausali pea le malosia o le Faavae i lona vaega lea.

(i) O lea lava fautuaga e 45 aso e faatauto ai sui usufono o lea lava o lo o talanoa mai foi i le fautuaga na se i mavae na ou lauina atu.

O le isi fautuaga na tuuina mai o le Komesina ma le Sui Komesina o Ofisa o le Komesina o Faiga Palota ina ia i ai se isi itutino e faatuina e ta'u o le Public Service Commission aua faiga palota a le atunuu. O lea mau na tuuina mai ma le fautuaga na tuuina mai a le Komisi ua teena le fautuaga e le Komiti ona o lo o i ai le matou naunautaiga o lo o i ai lava ma mafatotoga le Komesina o lo o i ai nei i le faafoeina o ona tiute tauave.

(o) O lo o faagasolo mai tuutuuga ia e le aafia i lalo o tuutuuga o galuega patino ma galuega faatino e pei ona poloaiina ai e le Kapeneta.

(u) Ua teena foi le fautuaga a le Komisi lenei e pei lava ona ou fai atu ua o latou toe taua mai foi le toe i ai o se isi vaega o le Public Service Commission lea ua uma ona ou avatu le agaga o le Komiti lenei.

Fautuaga Lona Lua lau Afioga i le Fofoga Fetalai, o lo o faanumera i le 4.2.2.

Fautuaga 4.2.2 - Faamasinoga, Faiga Taufaaavalea ma Talosaga Apili:

O lo o talanoa le vaega lea o le Tulafono i le toe 12 masina ona toe faia lea o se isi faiga palota o lo o talosaga mai, aepeitai o le vaega lea ua talia le fautuaga ona e patino tonu i le Fono Faatonu po o le Executive e latou te faia. E i ai le agaga maualuga e le mafai e le Palemene ona fausia ni Tulafono ma ni Teuteuga o Tulafono, e ono toe noatia ai lona malosia e faatino ai ana Tulafono ma ni Teuteuga. O lona uiga a faatulafonoina le 12 masina e pei ona fautuaina, o le a noatia foi le malosia o le Palemene e toe faatino ai ni teuteuga taua tele mo Samoa.

(e). Talia le Fautuaga:

O lo o tatalo mai e toe faamalamalama atili le Tulafono o Faiga Palota matou te talia aua o se toe taufagufagu lea a le Komesina o Faiga Palota ma a latou matafaioi fai o le ala lea o le talia o le fautuaga.

(i) Talia le Fautuaga

E lilifa le (e) lau Afioga i le Fofoga Fetalai i sui usufono ua fesui ai Pati e i ai po o se isi Gagana Faa-Samoa ua latou kolosi le floor o le Maota lenei. O le matau a matou, o le faaiuga o le Palota 2021 na se i mavae atu nei, na atagaia ai nisi foi o sui usufono ma nisi foi vaega ua tupu mai i le Palota. Ae i ai le matou manatu, o le Palota 2021, o isi o Sui Tauva na manumalo mai le Faiga Palota ae na toe faamavae mai le tofi e ui ua maea ona faaulu atu ni talosaga i le Faamasinoga e faaulu i ai latou. E manatu le Komiti i le vaega lea o lo o faasaga i ai le Komiti e avatu ana fautuaga ma ana teuteuga. O ana Teuteuga la e faapea:

i. *Ia aiaia faaletulafono le le mafai e se Sui Tauva na manumalo mai se faiga palota ona toe faai i tua mai le tofi, i le maea ai ona faaulu atu o se talosaga a se isi Sui Tauva i le Faamasinoga e faasaga ia te ia.*

O le Teuteuga lona lua a le Komiti e teuteu ai lea vaega ua fautua mai ai le Komisi:

ii. *Ia aiaia le tutusa o faasalaga e tai 5 tausaga e aafia ai le Sui Tauva ua faamaonia faale-tulafono i moliaga o faiga taufaavalea, ma le Sui Tauva na manumalo mai le faiga palota a ua toe faamavae ua faaulu atu se talosaga e faasaga ia te ia, e pei ona aiaia i le Fuaiupu 139 o le Tulafono o Faiga Palota 2019.*

Fautuaga 4.2.3 - Faatupeina o Taulumaga o Faiga Palota.

Teena le Fautuaga.

Ona e mafua mai ina ia atagia ai le atoa o le 5 tausaga o le Paeaiga ma so o se Paeaiga e le natia le Paeaiga Lona XVII lenei sa faatinoina le faiga filifiliga ia Aperila ae o lo o fautua mai le Komiti ina ia tuu ia Fepuari ae i ai lona... O lona uiga e le atoa ai le 5 tausaga o le Paeaiga. O le ala lea o le teena e le Komiti o le fautuaga ona e le o taoto lelei.

e) Talia le Fautuaga

O lea lava fautuaga o lo o faataatia mai e uiga ia tatou Faiga Palota ua talia le fautuaga o lo o faapea mai ia aiaia le tasi le aso o le faiga palota aoao a le atunuu ua talia le fautuaga ma e i ai foi fautuaga a le Komiti o lo o faapipii faatasi atu ma le fautuaga a le Komisi. O le fautuaga e faapea:

- i. *Ia aiaia le tasi o le aso o le Faiga Palota Aoao a le atunuu, e aofia ai ma i latou o lo o agavaa i le palota muamua e pei ona i ai i le taimi nei.*
- ii. *Ia aiaia le taofi o le toe faatinoina o Palota Muamua, e pei ona aiaia i le Fuaiupu 61 o le Tulafono o Faiga Palota 2019; Ia aiaia le i ai o se vaega faapitoa po o se itu e faaigoaina o le Laina Faapitoa (Green Lane)", i le aso lea e tasi o le a atofaina mo le Faiga Palota Aoao. O le vaega lenei lau Afioga i le Fofoga Fetalai, o le a faaogaina e i latou e i ai manaoga faapitoa, tagata matutua, ma i latou uma o lo o agavaa i le Palota Muamua o lo o aiaia i le Fuaiupu 61 o le Tulafono ma le Lona 4 o Fautuaga a le Komiti o lo o tuuina atu ai*

- iii. *Ia aiaia foi le mafai ona faaogaina o le vaega leni “Laina Faapitoo (Green Lane)” e tagata palota lautele pe afai o avanoa, ae fai fuafua i le tofa ma le faautautuga tatau a le aufaigaluega o lo o gafa ma le faatinoina o le faiga palota i lea taimi.*

i). Teena le Fautuaga

O le fautuaga ua tuuina mai, taimi o faiga palota ua teena le fautuaga a le Komisi o lo o fautua le Komisi ina ia fai i le 7 i le taeao seia oo le 5. Peitai o le tuualalo a le Komiti leni ina ia faatino i le 7 i le taeao seia paia le itula e 4 i le afiafi ae tuu le avanoa i le tasi le itula i le 4 agai le 5 e tapena ai le Ofisa o Faiga Palota ma a latou faaamaumauga a ua avea foi ma vaega e malupuipua ai lo latou soifua fealuai ma le saogalemu a o maua le malamalama.

Fautuaga 4.2.4 - Faaogaina o Tekonolosi ma Fesootaig Faaneionapo.

Teena le Fautuaga

Ona o le mafuaga leni afai e solia e se isi i le taimi o ana campaign lea vaega o lo o i ai lava Tulafono e sulu iai ina ua faaogaina le soligatulafono o le defamation po o le taufaaleaga o Sui Tauva a o agai i le faiga palota.

e). Teena le Fautuaga

Ona e le fesootai le Tulafono ma le fautuaga ua aumai ma le autu o le Lipoti o le suesueina o faiga palota.

Fautuaga 5.1.1.2 - Lola Palota

a) Talia le Fautuaga

Faaitiitia le faasalaga mai le \$2000 i le \$100 talia lelei e le Komiti leni le fautuaga ina ia faaitiitia le sala tupe mai le \$2000 i le \$100 le faasalaga o le tagata e le resitara ma le palota.

e) Teena le Fautuaga

Ma ua i ai le agaga o le Komiti ia faamalositia lou palota e le gata ina e resitara e faamalositia a ia faamalositia foi lau palota fai lau filifiliga aua sou leo o upufai o le atunuu.

i) Teena le Fautuaga

E teena le fautuaga e pei ona fautua mai ai le Komisi a ua manatu le Komiti e ao foi ona tuu i ai sana iloiloga ma se fautuaga e faapipii i ai. O le vaega leni e faatatau i sui tauva ma a latou fanau se i tulou le Maota ina ia atagia ai o lo o i ai le Teuteuga:

- i. *Ia aiaia le aofia ai ma fanau a Sui Tauva faatasi ai ma latou maupaolo e auala mai i fanau a Sui Tauva, ae le agavaa ai maupaolo ua noatia i lalo o le (2) o le Fuaiupu 26 o le Tulafono maupaolo lea ua faasuafa mataiina.*

O lona uiga o lea fautuaga ua ala ona matou teena ona o lo o i ai nei i le Tulafono e mafai lava ona ave faatasi ou alo i le vaega o le a tauva mai ai le Sui Tauva.

o). Nofo i Upolu ae palota i Savaii

Teena le Fautuaga

Ua teena le fautuaga mai a le Komisi Suesue lenei ina ia aua ne i i ai se avanoa o le tagata e nofo i Upolu po o fea lava o Upolu nei mo se faataitaiga, ae faamoemoe e palota i nuu i tua po o le motu tele i Savaii. O le ala o le matou teena o le fautuaga, o lo o faamauina ai o le ala lea o le faamauina po o le resitala i o latou itumalo i Salafai, ona e ui e nofomau i Upolu ae o le agaga o lo o fai monotaga ma agai i itumalo i Savaii ma tautua.

u). Talia le Fautuaga

I le toe momoliina mai pea le siakiina o le lola palota e ui ua uma ona o latou momoli mai le fautuaga e pei ona ou taua muamua.

Fautuaga 5.2.3 - Sui Faipule Tamaitai

Lau Afioga i le Fofoga Fetalai, tasi lea vaega na matua oo i ai le loloto o le faatofalaiga a le Komiti aemaise o mau na oo mai luma o le Komiti. E tolu filifiliga na aumai e le Komisi po o options e fai agai ai le filifiliga mo Sui Faipule Tamaitai. Lau Afioga i le Fofoga Fetalai ma le mamalu sauoo o le Palemene ma Samoa ua faafofoga mai, ua teena uma filifiliga e tolu e le Komiti lenei. O mafuaaga lau Afioga i le Fofoga Fetalai, ona e le o manino lelei foi i totonu o le Faavae i le talanoa mai a le Faavae i le faaaogaina o le 10% lenei. Pe a o i ai pe afai foi e i ai ni ona itu tuga e ono alia'e mai.

Lau Afioga i le Fofoga Fetalai, ou te faatulou atu foi i le tofi o le Itumalo Salega le paia o le Itumalo ne i fai i ai se faataitaiga, ae faapea se faataitaiga na lilifa i ai Sui o le matou Komiti ona o le faaiuga ua tupu ma o le faaiuga ua aloaia e tau momoli atu ai se feau i le teena ai e le Komiti lenei le mafuaaga o le 10% lenei.

O le faiga filifiliga a le itumalo Salega e pei ona ou faamalulu atu i lau Afioga i le Tofi o Salega 1. Faipule na manumalo 381 ua avea ma faipule filifilia o le Maota, le sui na sosoo atu i ai o palota na maua e 375, sui lona 2 lea, sui na sosoo atu ai o le sui lona 3 e 373 palota na maua, sui lona 4 o le tauvaga na i ai, e 63 palota.

Lau Afioga i le Fofoga Fetalai, matou te fia faamanino a le vala lea o le mafuaaga pe a na fai, pe a na fai, o le sui na tulua ma le sui na tutolu o ni suafa tamaitai po o ni sui tamaitai ua matou faapaseneina le va o le tulaga muamua o le faipule filifilia ma le tulaga lua e 98.43%. I le va o le tulaga muamua ma le tulaga tolu e 97.90%. Lona uiga lau Afioga i le Fofoga Fetalai, ona o le le i manino mai foi o le Faavae o lo o tusia ai e ono lua ni sui faipule tamaitai o lea itumalo pe tolu foi pe a na faapea o ni sui tamaitai e maua le nofoa tulua, tutolu. O manatu na e le i tupu ae matou te talitonu e ono tupu, e ono tupu se tulaga.

Ae ui o lea e faamalulu atu ua na o se faataitaiga na matou avatu e mafuli i ai vaega na oo i ai la matou filifiliga ma la matou suesuega.

Fautuaga 5.3.4- Itumalo Faale-Aganuu ma Itumalo Faa-Palota

Ua matou oo mai itumalo faale-Aganuu ma itumalo faa-Palota Lau Afioga i le Fofoga Fetalai. E pei lava ona matou fai atu o lo o taumafai lava i se auala e faapuupuu ai le Lipoti. Peitai e fai si tele o le Lipoti ma a latou fautuaga na aumai. E ui o lea, o le a taumafai atu lava i se auala e sili ona maua ai le mapo o outou finagalo. E tasi lenei vaega o le Lipoti na fefulisa'i ai finagalo o mau ma molimau na tuuina mai luma o le Komiti i itumalo faale-Aganuu ma itumalo faa-Palota pei foi ona outou tagatagai ai i totonu o le Lipoti o lo o i ai vaega o le lipoti o lo o faavasega mai ai le faitauaofai o lea itumalo ma le aofai o tagata na palota i le 2021.

E talitonu le Komiti o itumalo faale-Aganuu po o itumalo Faaalalafaga e pei ona taua i totonu o le Faavae ae ua tatou galulue nei e faaaogaina itumalo faa-Palota e pei ona i ai le Paeaiga 17 nei, e manatu i matou ua teena le fautuaga i le faaaoga pea o itumalo faa-Palota. O le mafuaaga, lau Afioga i le Fofoga Fetalai, e talitonu le tele o mau na folasia e le taliaina faigofie e itumalo ia vaevaega e pei ona tuuina mai i lipoti a le Komisi ona o aafiaga e ono tulai mai i tuaoi faalenuu, faale-aganuu aemaise o saofaiga a itumalo taitasi pe a oo ina potopoto. E i ai le taofi o Samoa o le atunuu ua uma ona tofi e mapo mea uma i lana aganuu o lo o taialina ai faiganuu.

I le Taulumaga o le Lipoti a le Komiti, na autasi ai ina ia aiaia le toe fafoi o Itumalo Palota i vaevaega tuai sa i ai ua ta'ua o Itumalo Faa-alaalafaga. E pei foi ona aiaia i le Faavae le faaaogaina o le upu "faa-alaalafaga". O le vaevaega lenei sa i ai e 49 Nofoa o le Palemene e pei ona faatino i le Faiga Palota mai le tausaga 1991 seia o'o mai le Faiga Palota 2016. E talitonu le Komiti o le vaevaega aupito talafeagai lea ona o lo o taoto lelei ai le saofaiga a Afioga ma Itumalo. E le gata o Tumua nei ae faapea foi le saofaiga a Puleono i Salafai. E manatu le Komiti, a alualu suaga o le vaatele ae tefa le tauala ina ia toe faaaogaina le vaevaega o Itumalo Faaalaalafaga, ia silasila i le faaofiina o teuteuga nei ua ta'ua i lalo i le Tulafono o Itumalo Palota e faapea. Ma, o Teuteuga foi ia a le Komiti lau Afioga i le Fofoga Fetalai e fia faapipii atu e tusa ai o le fautua mai a le Komisi Suesue o Faiga Palota:

1. O Itumalo tu taulaga;

- i. Ia fautuaina ai o le toe faaaogaina o le vaevaega o Itumalo Faa-alaalafaga, ia aiaia ni nofoa e 3 mo Itumalo Tu Taulaga ma faaigoaina, o le "*Itumalo Tu Taulaga i Sasae*", "*Itumalo Tu Taulaga Ogatotonugalemu o le Taulaga*", ma le "*Itumalo Tu Taulaga i Sisifo*".
- ii. Ia aiaia o le Sui Tauva ma le tagata palota e agavaa e tauva pe palota i Itumalo Tu Taulaga nei, ua na o matai ma i latou o lo o nofomau i nofoaga

o le a aiaia i se vaeveaga faale-tulafono e pei ona tapena mai ai le Ofisa o Faiga Palota.

2. ***Itumalo Faaalalafaga o Gagaemauga Nu.2- Saleaula ma Salamumu:-***
 - i. I le faatauaina ai o le toe faaaogaina o le vaeveaga o Itumalo Faaalalafaga ua mautinoa o le a aiaia ai le nofoa sa i ai muamua ua ta'ua o "*Gagaemauga Nu.2,*" e faasino tonu i afioaga ua ta'ua.
 - ii. Ia aiaia le toe fo'i o Salamumu i Saleaula e fai filifiliga faatasi i le taimi o Faiga Palota a le atunuu.

O le Mataupu lenei na fulisia ai le tele o finagalo ina ia toe faatuina se Nofoa mo afioaga ua ta'ua ma e faapea foi se manatu ua autasi i ai le Komiti ona o itu nei lau Afioga i le Fofoga Fetalai:

- Saleaula ma Salamumu ua le tusa ai ma tu ma le aganuu i le vaeveaga faa-alaalafaga.
- O Saleaula o se tasi o tootoo faitauina e ono iai pule i Salafai ma o le aveesea ai o lona Nofoa ua le toe atagia ai lea faalagiga.
- E le faigofie i Itumalo nei le auai atu i Faiga Palota a Itumalo fou na vaevaeina iai ona e iai lo latou talitonuga e leai so latou avanoa e mafai ai ona agavaa so latou Sui i le Tofi Faipule o Itumalo.
- E faigata ona auai i le taimi o potopotoga faaleaganuu a Itumalo ua aofia ona o tulaga i tofiga ma saofaiga i totonu o nuu.

O lona lua o Itumalo ua aveatu ai le fautuaga a le Komiti ma le Teuteuga a le Komiti i lalo o le faauluuluga po o le faaupuga, Itumalo Faaleaganuu ma Itumalo Faapalota;

3. ***O le Itumalo Faa-alaalafaga o Gagaemauga Nu.1, ia Leauvaa.***
 - Ua fautuaina ai le toe faaaogaina o vaeveaga o Itumalo Faa-alaalafaga ua mautinoa o le a aiaia ai le Nofoa o Gagaemauga Nu.1.
 - Ona o lea ia aiaia ai le toe fo'i o Leauvaa e ave ma nuu o le Itumalo Faaalalafaga o Gagaemauga Nu.1, e pei ona i ai i Paeaiga ua mavae.

4. ***O le fa o Itumalo Faa-alaalafaga ua aveatu iai le Teuteuga ma le Fautuaga a le Komiti, o le Itumalo Faa-alaalafaga nei o Faleata.***

- i. E fautuaina ai le toe faaaogaina o le vaeveaga o Itumalo Faaalalafaga.
 - ii. Ia aiaia le faatumauina pea o Nofoa e fa (4) mo Faleata e pei ona iai i le taimi nei.

A o lea fa (4) lau Afioga i le Fofoga Fetalai, e le fa o se faalagiga o ni Itumalo Faapalota, o Itumalo Faaleaganuu. E manatu le Komiti o le vaeveaga o le Itumalo Faleata o le a i ai nei e matua lagolagoina ona o lo o sosolo lava i tuaoi faaleaganuu lau Afioga i le Fofoga Fetalai. E le faupuina la pe afai e vaevaeina

i fuainumera e faaaoga le fuainumera o ni Itumalo Palota pei ona i ai nei, a ia faatumauina o Itumalo Palota Faaleaganuu i totonu lava ia o tuaoi faaleaganuu.

5. ***Itumalo Faa-alaalafaga o le Vaimauga:-***

- i. I le fautuaina ai o le faaaogaina o le vaevaega o Itumalo Faaalaalafaga;
- ii. Ia aiaia foi le faatumauina pea o nofoa e 4 mo Vaimauga e pei ona i ai i le taimi nei.

Lau Afioga i le Fofoga Fetalai, e tutusa lelei lava pei o le faaleoga o Faleata, e fa (4) faaleaganuu, ae le fa (4) faa-itumalo faapalota. O lo o sosolo lava e tusa foi o le matou mau ina ia toe faafo'i lava le atunuu i ana Itumalo Faaleaganuu.

O le isi Itumalo o lo o aveatu ai Teuteuga a le Komiti ma ana Fautuaga.

6. ***Itumalo Faa-alaalafaga o Aiga i le Tai.***

- i. I le fautuaina ai o le toe faaaogaina o le vaevaega o Itumalo Faa-alaalafaga ia faatuina se isi Nofoa faaopoopo e vaeluaina ai le Itumalo Faa-alaalafaga lenei o Aiga i le Tai.
- ii. Ia faaofi le vaevaega lenei mo le Itumalo o Aiga i le Tai e faapea; Lau Afioga i le Fofoga Fetalai;
 - “Aiga i le Tai” e aofia ai: Sagafili, Mulifanua, Samea, Fuailoloo ma Lalovi.

Ma se isi Nofoa e ono faaleoina e le Maota;

- “Aiga i le Tai i Atumotu”, e aofia ai: Manono-tai, Manono-uta, Apolima-tai ma Apolima-uta.

Lau Afioga i le Fofoga Fetalai e le natia e tusa ai o faamaumauga a le Komesina o Faiga Palota, tasi lea Itumalo e tele lana Lola e tulua ia Faleata le tele o lana Lola Palota. Ma le isi tulaga lau Afioga i le Fofoga Fetalai e le natia, e tolu motu o le Itumalo lenei. O le ala lea o le liliu i ai o le tofa ua alagatatau. Pe afai foi ae talia lenei Lipoti ae toe faafoi le alaalafaga o lo o matou... e tumau pea le tele o le Lola Palota o le Itumalo lenei.

7. ***Itumalo Faaalaalafaga o Faasaleleaga Nu.2 – Safotulafai.***

O le isi Itumalo o lo o aafia i le matou Teuteuga ma o lo o aveatu Faa-fautuaga, o le Itumalo Faa-alaalafaga o Faasaleleaga Nu.2. po o le Pule ia Safotulafai. O lo o sosolo lava foi le matou tu'itu'imalofie ona o tulaga lava o Itumalo Faaleaganuu ua mafuli i ai le Komiti ona tasi lea Pule ia Salafai, e atagia ai Puleono ia Salafai o lo o tuuina atu i ai le Teuteuga a le Komiti i lea vaega.

8. *Itumalo Faa-alaalafaga o Vaisigano Nu.1, Asau*

E vasaga lelei foi ma le finau atu i le Itumalo Faa-alaalafaga o Safotulafai, le Pule ia Mati'a ma Mati'aituau.

Fautuaga 5.4.3, o le Agavaa o Sui Tauva.

a) – Teena le Fautuaga.

O lo o matua matou teena le fautuaga. Fautuaga na tuuina mai e le Komisi o Faiga Palota, ina ia agavaa se Matai.

Mo se faataitaga, o se Matai mai nuu i tua ia po o le motu foi i Salafai, tulou Puleono, ae alala nofomau i Apia nei ina ia mafai ona alu i le filiga o Nofoa o le Itumalo o lo o i ai i Apia nei.

O lea na matua matou teena ai le fautuaga lea ua aumai i lea vaega o le lipoti.

- e). O le 5.4.3, nofo i Apia le Matai ae tauva i Savaii, tasi lea vaega o le Fautuaga na fautua mai ai na matou teena. Afai lava mo se tala faataitai, o lo o e alaala i Apia nei ae e te finagalo e te fia tauva mo lou Itumalo, ia po o le motu foi i Salafai, se i tulou le motu i Puleono, a o lo o faia lau monotaga e avanoa lava lou tauva. Ae o lo o aumai le faamamafa ina ia faaaogaina pea e Matai o lo o nonofo i Apia nei e taufetuli i faiga filifiliga a le atunuu i le lumanai.
- i). O lo o i ai le teuteuga, ua matou talia le fautuaga o lo o fautua mai aemaise lava i le vaega lea o le suia o tausaga e aloaia ai le tagata ua na soli le Tulafono o Faiga Palota. O lo o i ai le Tulafono tuai, a o le Teuteuga lea a le Komiti ua tuu atu i luma o lenei Palemene, ina ia suia le valu (8) tausaga o lo o iai i le sefulu (10) tausaga talu ona aafia i soligatulafono.
- o). Ua matou talia lelei le Fautuaga a le Komisi lea, fautua mai le Komisi so o se alalafaga ua i ai le autasiga a Alii ma Faipule, e leai sa latou filifiliga e faia, fautua mai ina ia tuu i ai se \$20,000.00 mo lea Itumalo, ina ia faasaoina ai le selau (100) ma ona tupu afe o lo o fai ai ma tapena ai le Ofisa o Faiga Palota, Itumalo taitasi pei o fuainumera ia na aumai i le Faiga Palota lea ua te'a nei.

Fautuaga e 5.5.3, Lesitala o Vaega Faaupufai.

E faaoga ai auala faatekonolosi. Lau Afioga i le Fofoga Fetalai, ua teena le Fautuaga. Ua matou manatu le Komiti o lo o lelei lava lenei vaega ina ia susu pea le Failautusi a Vaega Faaupufai ma momoli pepa o faamaumauga e lesitala ai le Pati.

Fautuaga 5.6.3 - Tulafono o Soligatulafono ma Faamasinoga.

- a). Ua matou manatu ina ia teena le Fautuaga lenei. Faiga Faavae a le Pule Faatonu ma le Executive, ina ia fuafua a latou faatinoga i Tulafono Tau Faaofi ma Teuteuga ua fuafua e faatino ai.

e). Ua manatu le Komiti e tuu i ai se Teuteuga ae ua teena le Fautuaga.

Fautuaga o lo o tuu mai ina ia siitia, pe 50% palota e mafai ona maua e se isi Sui Tauva e agai ai sana sue i le Faamasinoga ma ua matou manatu i le faaitiitia ai o le tele o Faamasinoga Tau Palota ina ia siitia i le 75% o le tagi pe afai e maua e le tulua pe tutolu le 75% a le o lo o sili i le latou tauvaga. Ma ua i ai foi Teuteuga lau Afioga i le Fofoga Fetalai e pei ona tuuina atu i le Lipoti ina ia siitia mai le 50 i le 75% e faaitiitia ai le tele o Faamasinoga e tutupu mai.

i). Ua matou talia le fautuaga e pei ona fautua mai i soligatulafono e ono aafia ai se Sui. Ua matou talanoa ma tuuina atu ai faasalaga ina ia fai fuafua faasalaga agai i tagata na o i le Palota. Ua matou talia ai le fautuaga e pei ona i ai.

o). Ua matou talia le fautuaga o lo o faapea mai, ona o molimau pepelo i luma o le Faamasinoga aemaise i latou e molimau i Faiga Palota. Afai foi ua i ai ma se Sui Tauva ua aafia, matou te talia le fautuaga ina ia tuu mai e le Faamasino Sili pepa ua aafia ai, le ua aafia le Nofoa lau Afioga i le Fofoga Fetalai.

Fautuaga 5.7.3 – Palota o Tagata Samoa o Aumau i Atunuu e mamao

Ua i ai lo matou manatu e le o se mataupu faigofie. Ae manatu le Komiti o le a tuu atu i le Pule Faatonu ina ia fai fuafua mo se taimi lelei ma le faaogaina o se system lelei e control ai lea vaega.

Fautuaga 5.8.3 – Sui o Vaega Faaupufai

Sui o Vaega Faaupufai o lo o ta'ua i le 5.8.3, fesuia'i o Pati a le sui, ia po o le feme'ia'i i totonu pe kolosi le floor.

Lau Afioga i le Fofoga Fetalai e le natia, o le aso ananafi ia sa faatino ai foi le faatautaina o nisi sui pei foi o lo o i ai le vaega tonu lea e ta'ua. E i ai lo matou manatu o le a lafo i le sui usufono o ia o le Tama o le Itumalo, o ia foi e faia le faaiuga. Pe afai e silafia lava e ia e mafai e lona malosi e lu'i ai le Faamasinoga le tulaga lea. O le ala lea o le matou teena o le fautuaga o lo o faapea mai, ina ia taotaomia pea i le mea o lo o i ai, peitai e tatala lava noanoataga fua i le faitalia o le sui usufono latou.

Fautuaga 5.9.2.1 – Toe Faatulagaina o le Ofisa o Faiga Palota.

Ua toe ta'ua fo'i le toe i ai o se Electoral Service Commission ua faatolu ona ta'ua i le lipoti, ua matou teena lea fautuaga pei ona i ai.

Fautuaga 5.9.3.3 – Pule ma le Afaigaluega a le Ofisa o Faiga Palota

O lo o tatalo mai ina ia suia le faaleaoga po o le faalagiga mai le Komesina o Faigapalota i le Ofisa Sili, ua matou manatu, taoto ai i i o lo o lelei i lenei taimi. E pau lava o lea o le faamaoni i tiute ma faiva ua tofiaina ai.

Fautuaga 5.10.2 – Aloaia o Pulega Mamalu Faale-Aganuu i Upufai a Samoa.

O le toe i ai o se isi Maota o Tumua ma Pule, ua ta’u faalua mai foi i le Fautuaga. Pei lava ona ou folasia atu lau Afioga i le Fofoga Fetalai, ua teena e le Komiti lenei.

Fautuaga 5.10.3.5 – Palota mo le Sefulu Valu Tausaga

E pei ona aumai i le fautuaga, ua teena lea fautuaga, fo’i a tatou fanau aoga e aoaoina le poto salalau ae taatia Vaega Faaupufai ma le Polokiki o lo o i ai le au 21 agai i luga.

O le isi foi vaega o lo o i ai le tatou Youth Parliament e mafai ona omai e aoaoina ai i latou, aua ne i faaluafesasiina ia fanau aoga i aoaoga.

Ia lau Afioga i le Fofoga Fetalai o le tele lea o mau ma fautuaga.

Ona matou se’e mai lea i mataupu na matauina ua tuuina atu ai ni fautuaga a le Komiti lenei.

7. MATAUPU NA MATAUINA UA TUUINA ATU AI FAUTUAGA

1. E le o toe umi lau Afioga i le Fofoga Fetalai, o le faaaogaina o le upu “Nofomau” e pei ona matou matau i totonu o le Tulafono o Faiga Palota. Na matou matau ai i le upu “nofomau” e pei e foliga mai ua noatia ai le tagata o lo o nofo iinei ae fia malaga i le weekend e asi le Itumalo ma le nuu. Ae pei e foliga mai a talanoa i le nofomau, i le matou lea tilotilo, ia o lona uiga ia auai mai lava i le Aso Gafua e tau i le Aso Sa. Ona matou manatu lea, o lo o ua tuuina atu i ai vaega uma ua matou manatu ai, o le nofo ai inei ona e le natia tulaga e siitia i galuega ma fanau aoga ia ma nisi vaega e ave i ai le faamuamua.

O le itu tau le monotaga lau Afioga i le Fofoga Fetalai, o lo o i ai lava le faamaninoina o le monotaga i le Komesina o Faiga Palota ma le Tulafono, peitai, o lo o i ai la matou Teuteuga e avatu faafautuaga lau Afioga i le Fofoga Fetalai.

O Teuteuga o lo o i ai le (1) e faapea: i aiaia o le uiga o le monotaga faalenuu, auai i fononua a le nuu, auai i so o se faamoemoega a le nuu, ma le itiiti ifo ma le 50% o fonotaga a le nuu na auai i totonu o le tausaga e tasi. Seiavagana ai sui tauva o lo o ia umia se tofiga faale-Malo i atunuu i fafo. Ia aiaia le ave o faataua i le monotaga faalenuu, seiavagana ai Itumalo Tu Taulaga e aiaia le faamallosia o le faaaogaina o matafale faalelotu.

Lau Afioga i le Fofoga Fetalai, o agavaa o sui tauva: O lo o faapea foi ona matou talanoa atu e tusa o le fautua mai a le Komisi, a o lo o i ai foi le teuteuga a le Komiti lenei. E faapea le teuteuga e tuu atu i luma o le Palemene. Ia aiaia le soloia o teuteuga na faatinoina i le Fuaiupu 8(3)(d) ma le 5 o le Tulafono o Faiga Palota ina ia toe faaaogaina aiaiga e pei ona i ai nei.

Fuaiupu 8(3)(d) ia faitauina e faapea: O se tagata o ia lea ua na faamaliesina le Komesina e faapea, e manaomia e lea tagata togafitiga faafomai i fafo atu o Samoa, mo le vaitaimi ia le sili atu ma le 125 aso i le tausaga e tasi. Peitai o le sili atu ma le 125 aso o le a manaomia loa se faamaoniga mai le fomai.

Teuteuga o le (3) Fuaiupu 8(5) ia faitauina e faapea: Tolu tausaga le tapulaa maualalo. O lona uiga sa i ai i totonu o Samoa se tagata mo se vaitaimi e itiiti mai e 240 aso i tausaga taitasi mo se vaitaimi e tolu tausaga sosoo.

Lau Afioga i le Fofoga Fetalai o le vaega lea ina ia mautinoa ai o lo o lava aso e malaga ai i fafo, aemaise foi o aso e nofo ai le o le a tauva i le Faiga Palota i tausaga taitasi.

Matou oo mai le vaega mulimuli e tusa ai o fautuaga e tusa ai o mau na maua e le Komiti. Lau Afioga i le Fofoga Fetalai, o le faatinoga o oo ma momoli. Na matou matau i ai i oo ma momoli, a o saofaga atu i ai se leo o le Komiti lenei i le mamalu o le Palemene. Sa tatou faia ona o se faafetai a le sui ua manumalo mai le itumalo, peitai ua tatou molimauina i nei aso ua le utuva le sulufai mai o le itumalo i le tofi o le itumalo e ala eseese mai ona e manaomia vaega eseese e manaomia aua le atiaaina o le aiga, nuu ma le Ekalesia. Ona matou manatu lea, pei foi ona i ai lenei vaitaimi, e tele valaaulia o sui usufono i le taimi lenei, e le gata mo se faataitaiga o tauvaga tausala, o mea fai a Ekalesia, o le mafutaga a tina ma isi vaega. Ona matou manatu lea, o lou faatinoina lava o le faamoemoe lea, o lea lava ua e oo i itu taitasi ma itutino o lou itumalo. Ona matou manatu lea, e le nofonofa le sui usufono i mea ia, o lo o galue pea le sui usufono i tulaga nei. Ona matou manatu lea, ia o le matou lea fautua atu i le oo ma le momoli ina ia faia faatulafono ae taumafai pea le sui usufono e mafuta i lona itumalo i vaega taitasi e pei ona atagia ai le sulufai mai o itumalo.

Lau Afioga i le Fofoga Fetalai, ia ua matou oo mai le vaega mulimuli o le Lipoti. O a matou fautuaga e tuuina atu i le Palemene lau Afioga i le Fofoga Fetalai.

I le faia i luga o ana Sailiiliga e fautuaina e le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae le Malo o Samoa e faapea:

1. Ia silasila i le teuteuina o le Vaega 44(1A)(a) o le Faavae o le Malo Tutoatasi o Samoa, o lo o aiaia ai le nofoa 10% o Faipule Tamaitai i totonu o le Maota. O le faamoemoe o le teuteuina o le Vaega lenei, ina ia soloia ai le faaaogaina o le nofoa 10% o Tamaitai i totonu o le Maota. I le matau a le Komiti e tusa o ana mau na faatalanoaina, na mafuli ai i le teena o le toe faaaogaina o le 10% o Tamaitai ona o mafuaaga ua folasia i luga i le vaega 5.3 o lana Lipoti lenei e faatalanoaina.
2. Ia silasila i le soloia o le Tulafono o Itumalo Palota 2019 o lo o i ai nei, ae toe faatulai le vaeveaga na i ai i Itumalo Faaalaalafaga e pei ona sau ai mai le tausaga e 1991 seia oo mai i le 2016. O le vaeveaga lea na aiaia ai le 49 nofoa o le Palemene, ma e talitonu le Komiti o le vaeveaga aupito talafeagai lea ona o lo o sosolo le vaeveaina o itumalo i tuaoi faaleaganuu. E manatu ai le Komiti ina ia faaofi teuteuga i nisi o itumalo, o lo o taua i luga i le vaega 6.7 o lana Lipoti e pei ona i ai “Fautuaga 5.3.4 – Itumalo Faale-Aganuu ma Itumalo Faa-Palota.
3. Ia silasila i le teuteuina o le Fuaiupu 8(2)(d)(i) o le Tulafono o Faiga Palota 2019 ina ia aiaia le suiga o le “8 tausaga” o lo o aia faaetulafono e siitai i le “10 tausaga.”

4. Ia silasila i le soloia o le Fuaiupu 8(3)(d) ma le (5) o le Tulafono o Faiga Palota 2019 o lo o i ai nei, ae toe faatulai aiaiga na i ai i le Tulafono o Faiga Palota 1963 e faapea lona faitauina:
 - i. Fuaiupu 8(3)(d) ia faitauina e faapea:

“O se tagata o ia lea ua na faamalieina le Komesina e faapea e manaomia e lea tagata togafitiga faafomai i fafo atu o Samoa, mo le vaitaimi ia le sili atu ma le 125 aso i le tausaga e tasi, peitai o le sili atu ma le 125 aso o le a manaomia loa se faamaoniga mai le fomai.”
 - ii. Fuaiupu 8(5) ia faitauina e faapea:

“Tolu (3) tausaga le tapulaa mauualalo” o lona uiga sa i ai i totonu o Samoa se tagata, mo se vaitaimi a itiiti mai e 240 aso i tausaga taitasi mo se vaitaimi e tolu (3) sosoo e faaiuina i le aso o filifiliga, peitai e le aofia ai le toesea le tumau mai Samoa o se tagata o lo o i atunuu i fafo ona o tiute faale-Malo.”
5. Ia silasila i le teuteuina o le Fuaiupu 8(5) o le Tulafono o Faiga palota 2019 i le faamatalaina o le ‘Monotaga’, ina ia faaofi teuteuga ua taua i lalo:
 - i. Monotaga, o lona uiga o le faatino o monotaga faale-nuu, auai i fono a le nuu, auai i so o se faamoemoega o le nuu ma le itiiti ifo ma le 50% o Fonotaga a le nuu ma ia auai ai i totonu o le tasi (1) tausaga, seiavagana ai Sui Tauva o lo o ia umia se tofiga faale-Malo i atunuu i fafo;
 - ii. O lea lava Fautuaga, ia aiaia le ave o le faataua i le monotaga faalenuu, seiavagana ai Itumalo Tu Taulaga e aiaia ai le faamallosia o le faaaogaina o matafale faalelotu;
 - iii. Ia aiaia le faamallosia o Nuu e faaoo mai faamaoniga tonu ma le sa’o, o le auai i fono a nuu o le Sui Tauva e tauala atu i le Sui o le nuu ma le Sui Tamaitai o le Nuu.

Fautuaga e 6 mai le 10 o Fautuaga:

6. Ia silasila i le toe teuteuina o le Fuaiupu 16(1) o le Tulafono o Faiga Palota 2019, ina ia aofia ai ma fanau o fanau a Sui Tauva faatasi ma maupaolo e auala mai i fanau a Sui Tauva. Peitai, ia le agavaa ai maupaolo ua noatia i lalo o le (2) o le Fuaiupu 16 o le Tulafono e pei ona ou lauina atu muamua. E manatu le Komiti e tataua ona malaga le Sui Tauva ma lona aiga e aofia ai ma lona toalua, o lana fanau, o fanau a lana fanau faatasi ai ma maupaolo e tauala atu i lana fanau, e palota i lona itumalo ma avea ai ma Sui Tauva;
7. Ia silasila i le suia o aso o le Faiga Palota a le atunuu mai le vaiaso atoa, i le na o le tasi le aso e atofaina mo le Faiga Palota. E manatu le Komiti o le aso lea e tasi o le a aofia ai ma i latou o lo o aiaia i le Fuaiupu 61 ma le 62 o le Tulafono o Faiga Palota 2019, peitai ia faatuina se vaega faapitoa po o se itu ia faaigoaina o le Laina Faapitoa po o le (Green Lane).

O le vaega lenei e faaaogaina e latou e aiaia i le Vaega 61 ma le 62 o le Tulafono.

8. Ia silasila i le toe teuteuina o le Fuaiupu 66(1) o le Tulafono o Faiga Palota 2019 ina ia suia itula e faatino ai Faiga Palota mai le 7.00 i le taeao i le 4.00 i le afiafi ae taoto atu le 4.00 i le 5.00 i le afiafi e toe tapena mai ai le Matagaluega ma faamaumauga o le Faiga Palota.
9. Ia silasila i le teuteuina o le Fuaiupu 108(2) o le Tulafono o Faiga Palota 2019 ina ia aiaia ai le suia mai le 50% o lo o aiaia faaletulafono i le 75% o palota e maua.

Ma le 10, o le Fautuaga mulimuli foi lea lau Afioga i le Fofoga Fetalai:

10. Ia silasila i le faaofiina o se aiaiga i le Tulafono o Faiga Palota 2019 ina ia aiaia ai faaletulafono:
 - i. E le mafai e se Sui Tauva o le a manumalo mai i se Faiga Palota ona toe faau i tua mai le tofi, i le maea ai ona faaulu atu o se talosaga a se Sui Tauva i le Faamasinoga e faasaga ia te ia;
 - ii. A o se Sui Tauva o ia lea ua manumalo mai i se Faiga Palota ae faamaonia le toe faau i tua mai le tofi, e tatau ona aiaia faaletulafono lona faasaga e 5 tausaga.

E faamalulu atu i lau Afioga i le Fofoga Fetalai, toe tasi.

11. Ia silasila i le faaaogaina ma le faauigaina o le upu Nofomau o lo o aiaia i le Tulafono ina ia mafai ona talatala ai le faaaogaina o lea upu o le Nofomau, ina ia aua ne i noatia ai Sui Tauva.
12. Ia silasila i le soloia o le Fuaiupu 101 o le Tulafono o Faiga Palota 2019, ona o le tulaga feteenai ma nisi o aiaiga o le Tulafono. E manatu le Komiti o lo o tapu i le Tulafono o Faiga Palota i faatosina e pei o le faatinoina o oo ma momoli sa tele ina aveseseina ai nisi sui tauva i le faamasinoga. O le faatinoga foi o le oo ma momoli e tasi lava lona faatinoga i totonu o le tausaga, peitai o le autovaa ma le agai mai pea o itumalo i sui usufono, o se faatinoga e tupu pea i totonu atoa o le Paeaiga, ma e ono aveeseina ai e ui o lo o tali atu i manaoga moomia o le itumalo.

Lau Afioga i le Fofoga Fetalai, o Fautuaga ia a le Komiti i Teuteuga ma ana sailiiliga na mafua ai ona tuuina atu. Ia ma le iugafono a le Komiti lenei:

IUGAFONO:

E fautuaina e le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae le Fono Aoao ina ia faamaonia le:

- P.P.2023/2024 Nu.37, Lipoti a le Komisi Suesue o le Faiga Palota 2021, Fepuari 2023 faatasi ai ma Teuteuga ma Fautuaga a le Komiti i lana Lipoti lenei, P.P.2023/2024 Nu.49.

Lau Afioga i le Fofoga Fealai ma le mamalu taupee o lenei Palemene, o le aaootele lea o le Lipoti ua tuuina atu ma le agaga faaaloalo tele. Manuia lenei Palemene. Faafetai.

FOFOGA FETALAI: Ua faamalo faafetai saunoa manino i lau Afioga i le Taitaifono ma la outou Komiti. Atonu o lea ua faafofoga ma le toto'a le paia o le Maota, e le itiiti la outou galuega sa outou feagai ai. O le mea lea ua matau atu lava o lo o soisoi le tatou Maotai le fiafia i la outou Lipoti. O le mea lea, malo faafetai. Ia, o le measili foi ona taua, ia, e ui lava o le Komiti na faatulai ona o le galuega a le Komisi. E moni foi lava e tele teena ia ua aumai, ae o lo o fanau mai ai isi fautuaga lelei mo a tatou Tulafono mo le agai i luma. O le mea lea, malo faafetai i lau Afioga i le Taitaifono mo le tolaulauina o la outou Lipoti.

Ua i ai le manatu o le Nofoa, ia ua tatou tulalata i le tatou malologa. O le a vave ona tatou malolo e tapena lelei mai outou finagalo mo le amatalia o a tatou felafolafoaiga.

O le mea lea, o le a faataatiaese a tatou galuega masani ai mo le taeao nei le tatou malologa masani, o le a toe amatalia pe a tatou toe talii mai.

Na faataatiaese Galuega a le Fono Aoaofaitulafono mo lana malologa masani i le itula e 10:47 i le taeao ma toe faaauau i le itula e 11:13 i le taeao.

FOFOGA FETALAI: Ou te faasilasila atu ua toe amatalia nei Taulumaga o le Fono Aoaofaitulafono. E i ai le manatu ua sao i alo le tautega o lenei taeao. E pei ona alo atu i ai le paia o le Palemene i le taimi o le tatou malologa.

Faafetai i le Atua i Lana foai ua maua ai se faasiligamalosii i le tatou Maota e faaauau ai le tatou galuega. Malo faafetai le onosai.

E faataatiaese a tatou Taulumaga mo le malologa o le taeao ua maea folasia e le Afioga i le Taitaifono le atoaga o le latou lipoti ma e talitonu foi ua lava foi se avanoa e silasila ai lo outou paia i le tatou lipoti pei ona tatou tolopo mai le aso ananafi. Ia ae i ai foi le manatu ua mafatotoga le paia o le Maota e tusa ai foi o le tolaulauga auiliili a le Taitaifono o le Komiti.

Mo le silafia, e faamanatu atu pea a tatou Tulafono Tumau, e na o le tai 15 minute le avanoa e saunoa ai sui usufono mamalu. Ma o le avanoa nei o se tasi o sui usufono mamalu e fia saunoa i le tatou lipoti. Ma le agaga faaaloalo.

Ia se i tulai mai le sui tamaitai o Alataua i Sisifo.

Afioga ALIIMALEMANU MOTI MOMOEMAUSU ALOFA TUUAU (Sui Usufono Tamaitai – Alataua i Sisifo): Ia, e faatalofa atu i lau afioga le Fofoga Fetalai, o le mamalu o le Kapeneta ma Minisita Lagolago, o e ua tatou faatasi i lenei taeao, Ofisa Sili o Pulega o Matagaluega ma Samoa ua potopoto ia faapea foi lenei itu o le malu i le afio o le Sui Taitai ma e e agaia le tatou Malo. O le a fai sao loa se manatu i le Lipoti ona e utiuti le taimi.

Faafetai i le Taitaifono o le Komiti i le galuega fita ma le mamalu o le Komiti. Ona e matau atu e 57 fautuaga a le Komisi Suesue ae ua na o le 12 fautuaga ua outou taliaina ae 45 fautuaga ua teena. A o PHD's ia sa tusia ma faafoeina le tatou Komisi Suesue. O lau faafetai lena, o le loloto o la outou tofa na iloilo ai le lipoti sa saunia e i latou e Faauluulu i ai faailoga faapitoa ae ua tou le alo lava ae ua auiliili i le mea e gata ai lo outou mafai aua se manuia o le tatou atunuu.

Ia lau afioga le Fofoga Fetalai, e na o le lua lava mataupu o le lipoti e fia oo i ai se manatu. O le faitau atu i le Lipoti a le Komisi Suesue, ou te faafetai ai i le tofa a le Komiti lea a le Palemene e ala lea i lana fautuaga e toe faafoi i itumalo faaleaganuu ona o le popolega sa i lou sui sui i si o matou itumalo o Alataua i Sisifo, o le aveesea lea o le matou itumalo e tolu ai itumalo e aveese, e pei ona i ai i le isi fautuaga a le Komisi Suesue. Faafetai tele lava. O lea e matau atu e 49 itumalo faaleaganuu ua outou toe faafoiina i ai i le tulaga sa i ai e pei o le tou fautuaga. Peitai o lea e matau atu e toe faaopopo foi ni nofoa se tolu mo itumalo tau taulaga ae faapea foi ma se isi faaopopoga i le itumalo o lau Afioga i le Taitaifono o le Komiti, faapea le itumalo o le afioga i le Fofoga Fetalai, faapea foi le itumalo o Asau, Vaisigano Nu. 1. O lona uiga o le a 55 sui usufono o le Palemene ma e talitonu e manaomia Teuteuga o le Faavae pe afai e talia. O le 55 foi lenei o sui, ou te iloa pe fia nisi tausaga o i luma pe 40 tausaga o i luma faatoa oo lea o se fuainumera i le 61 e ono suia ai le aofai o Tina i totonu o le Palemene. Pe 55 le aofai o sui, e nao le 6 a sui o Tina i lenei Maota. A o ai na iloa, ailoga lava e toe manaomia le faaatoaina o nofoa o Tina i le lumanai. Ailoga, mo se taimi umi lava, ae ia tumau pea i le Faavae. O le talosaga lena, ia tumau pea i le Faavae le 10% a nai Tina. E i ai lava le Paeaiga e manaomia ai e nai fanau teine o e ua fai mai le avanoa lea mo i latou.

O lona lua lau Afioga i le Fofoga Fetalai, o le a faamamafa se tala i le nofoa, na ala ai ona ou ulufale mai le Maota nei, o le nofoa lea o Tina. O fautuaga a le Komisi Suesue, e 3 ana vaega o fautuaga na aumai. O le mea lea ou te ofo ai i le Komisi, e leai ma se faaupuga mai a le fautuaga a le Komisi Suesue e taofia le 10% a Tina. O la e na o le aumai o options e liuliu i ai le tofa ae faataua ia i latou le va lea i fafo ma faigamalo a le Taupulega. Tagai outou i fonotaga ia sa matou auai atu i ai a le Taupulega o le tele ia o sui o Palemene eseese e talanoa mai i lo latou fiafia i saunoaga a le Afioga le Tamaitai Minisita, le Afioga i le Palemia, le Afioga ia Fiamie i lona naunautai lea e faataua tina i totonu o le Palemene. Ma ua faalauiloa ai foi e le afioga a le Palemia i le tele o taimi, e oo foi nisi o taimi matou te malaga ai. O le faalauiloa lava lea o le quota lea a Samoa ua lauiloa ai Samoa i atunuu i fafo.

O le 2 vaiaso talu ai na ou faalogologo ai i le news na sau ai le talia o le 30% a le Palemene o Initia a o le mea e mimita ai le loto o la e make reference i le quota a Samoa. O Samoa na amatamea, o Samoa na latou amataina. O le faaupuga o le lipoti fai mai e 398 le aofai o i latou na faaali finagalo i le faapaseneina i le aofai o le atunuu, e le atoa se pasene e na o le 0.19 o le aofaiga o le atunuu. E 240 na tetee, na o le 0.12% o le aofaiga ole atunuu lea na teena pe a fua i le aofaiga o le faitauaofai o le atunuu. O le a la le mea lea ua tupu? O lea ua fai mai le tonu o le Palemene e le 0.12% o le atunuu i le nofoa o nai Tina. A o le mea ou te ofo ai, e le i fai mai le Komisi a mea e taofi, ae foliga mai o totonu lava o le Maota lenei, ona o lea sa gasolo uma sui usufono i totonu e faaali o latou finagalo lea e faapea mai ai le faaupuga ua fulisia le Komiti

ina ia taofia le 10 pasene a Tina. Ou te faafetai lava i le sui usufono o Anoamaa 2, le Sui Taitai o lenei itu, na o le pau lea o le sui o le Komiti o la e faamau ai lona tetee i totonu o le Lipoti na te teteina le aveeseina o le 10%. I lou lea mafaufau, pau lava lea o le tama i totonu o le Komiti lea e faataua ia te ia si ana fanau teine ia faapea ma lona faletua.

Tofa Hon Lauofo Fonotoe Nuafesili Pierre Lauofo (Anoamaa 2): Lau Afioga le Fofoga Fetalai, faafetai lava mo le...

FOFOGA FETALAI: Ia, lau Afioga i le Sui Taitai i e faoa le 15 minute a le sui usufono mamalu... a o la e faaeaea mai le saunoaga i lau Afioga i le Sui Taitai. Seiavagana lava se mea taua...

Tofa Hon Lauofo Fonotoe Nuafesili Pierre Lauofo: Ia faafetai, ia o le a ou nofo i lalo.

FOFOGA FETALAI: Faafetai. Faaauau mai le saunoaga a lau afioga i le sui usufono mamalu.

Afioga ALIIMALEMANU MOTI MOMOEMAUSU ALOFA TUUAU: Ia ua le o toe umi. I se lagona vaivai, e suamalie a niu aati le molemole o le faaseeina o le matou itupa i totonu le Maota lenei i le fai mai e lagolagoina le siitia o le aofai o Tina i totonu o le Palemene pe a oo ina faafofoga i a tou lauga i totonu o le Maota. O upu masani a le Maota lenei e le milia faauu upu a le Palemene. Sa sili ai ona tuusao mai outou manatu, e le manaomia outou Tina i le Maota lenei. E matau atu i le Lipoti ua faia le finagalo o le Komiti ae tuu le mea lea na fautua mai ai le Komisi. Ae o le matau atu, e auga i manatu o e na faaalua, manatu o le Palemene lenei, aua lea na tatou o uma e faaali a finagalo o le le sui usufono ia.

Ia lau afioga le Taitaifono o le Komiti, o le fautuaga, se e pei lava ua outou vaai i le tagata o lo o umia le nofoa i le taimi nei ua mafua ai ae se i silasila ane lava i outou alo ma fanau. Ailoga e i ai se Tama e le naunau ia oo sona afafine i le faatumutumuga o se galuega, aemaise lava o le ofi atu o outou alo i le Palemene. Ailoga o i ai se isi o outou e nofo ma toe tape i lalo se avanoa ua na iloa e ono ofi atu ai lona afafine i le Maota o le Palemene? A fesili a outou fanau teine i le lumanai, a o ai na toe aveesea le tatou avanoa o tina ma tamaitai e siitia ai le aofai o tina i totonu o le Maota? O le tali, o le taimi o lou tina, o le taimi o lou tama, o le taimi o le uso o lou tama lea na ala ai ona matou le toe maua le avanoa.

Lau afioga i le Fofoga Fetalai, o le quota ua i ai nei mo Tina i faaalagamaea a atunuu o le taupulega, o lea sa i ai le filifiliga...

Tofa Hon Olo Fiti Afoa Vaai (Minisita mo Galuega, Felauaiga ma Atinae Eeseese): Lau Afioga i le Fofoga Fetalai...

FOFOFA FETALAI: Malie lau afioga i le sui usufono mamalu se i tuu atu le avanoa i le Afioga i le Minisita i le faauilavea.

Tofa Hon Olo Fiti Afoa Vaai: E faamalulu atu i le tuafafine vaeatu le afioga i le Tamaitai sui usufono ona o lea e matau atu i le tulaga lea ua mamafa agai i ai le saunoaga a le Tamaitai sui usufono ua pei ua tatou faatalale ma ua tatou le ano tele i le itupa o tamaitai i le Tulafono lea e faapea i le 10%. Ae ao ona ou faamanatu foi lea i lau Afioga, o tamaitai e lua o latou avanoa e agai mai ai i totonu o le Maota. O le avanoa muamua e tauva ai i le palota tele, o le avanoa lona lua o le saili mai o se avanoa i le 10%. O le taimi la lenei e le o paleni ma le itupa o alii ina nei mamafa tele le saunoaga foi a le afioga ma tuuai le Komiti i le tulaga o le toe iloilo o le 10% ae o la e matala le avanoa e tauva ai tamaitai leaga ne i te i ua toso sese le mataupu a o lea e faafogafoga mai le atunuu aemaise o alo ma fanau tamaitai. Leai, o lona e tele a le avanoa e te tauva ai i le palota, e toe maua lau avanoa faalua, i le 10%. Ia ma le faaaloalo.

FOFOGA FETALAI: Malo. Faafetai, lau afioga i le sui usufono mamalu lea ua faalava le amoa...

Afioga ALIIMALEMANU MOTI MOMOEMAUSU ALOFA TUUAU: Faafetai mo le faauilavea i lau Afioga le Minisita. O sou vaivaiga i le faitau atu i le Lipoti a le Komiti ua aveese le 10% a tina. O le fautuaga muamua lava a le Komiti o le Palemene. O le ala foi lona... A faalogo mai ua siisii se leo, ia leaga o le nofoa lona na ala ai ona ou ofi mai i le Palemene. E le mo au la, ae o fanau o lo o fai mai...

Afioga Auuapaau Mulipola Aloitafula Mulipola: Lau Afioga i le Fofoga Fetalai pe maua se avanoa...

FOFOGA FETALAI: Lau Afioga i le Taitaifono pe i ai se...

Afioga Auuapaau Mulipola Aloitafula Mulipola: Faafetai lau Afioga i le Fofoga Fetalai ua matau atu e ese foi aluga o le tatou fonotaga i lenei... ona ua tutulu le Afioga i le sui usufono. Leai e fia faamalamalama le tulaga lea, e le o se finagalo o le Komiti. Malie lau Afioga i le sui usufono tamaitai, o faamaumauga o molimau na tuuina mai ia i matou. Sa ou le manatu lava ou te tu atu i le taimi lenei ae se i sausi pea le Maota i le Lipoti lenei.

A o se faasaoga lau Afioga i le Fofoga Fetalai, e leai e le i faia e le Komiti le faaiuga lea ona tuu lea i le pepa e pei o le lipoti, na aumai i ana faamaumauga. Ma ou te fiafia e fai atu o lea ou te uu atu le pepa. O le majority o latou ma molimau e teena. O lona uiga e le i teena e le Komiti ae na fua i molimau. O le faamalamalama lea lau Afioga i le Fofoga Fetalai ma le faaaloalo.

FOFOGA FETALAI: Se i tulai mai lau Afioga i le sui usufono mamalu.

Afioga ALIIMALEMANU MOTI MOMOEMAUSU ALOFA TUUAU: Faafetai lau Afioga i le Taitaifono o le Komiti o lea e malamalama lelei lava. E pei lava ona amata i le folasaga na o le 0.12 o le pasene o le aofai o le atunuu lea e teena le nofoa o Tina, a o le faaupuga o le Lipoti a le Komiti fai mai, e le

o manino aiaiga o le Faavae e uiga i le faamautuina o sui usufono tamaitai aemaise o le faaaogaina tatau o le 10%. Aisea la ua aveese ai fua le nofoa ae le fai se fofo i le le manino o le aiaiga i le Faavae? Address sao le issue e manino mai i le Lipoti.

FOFOGA FETALAI: Toe 2 minute o le sui usufono.

Afioga ALIIMALEMANU MOTI MOMOEMASU ALOFA TUUAU: O le tele o faaupuga ona ua vevesi ai le Palemene ma ua tele ai faamasinoga. I sou vaivaiga e aoga mea na tutupu ua mautu ai le faaaogaina o le 10%.

Lau Afioga i le Fofoga Fetalai sa maua foi i nisi o saunoaga a Afioga i Minisita Tamaitai o lenei Maota le tetee lava i le 10% lenei o tina, sa faalauiloa i luga o le TV ma luga o auala faaneionapo.

O lau talosaga, aveese ia faiga faa-Pati. Lea ua atagia mai le aveesea o nofoa tina, tatou sapaia ma lagolago nofoa o nai tina e oo foi ia te outou o lenei itu lea na tetee, omaia tatou faia se tonu ia fealofani ai le Palemene. E le tumau lou sui usufono i le nofoa toe 2 tausaga. Ae faafetai ua maua sota avanoa ae ou te vaai i o outou alo ma a matou fanau teine o e o lo o fai mai.

Ia, ona faapea lea o se tala, lau Afioga i le Fofoga Fetalai o lea ua uma ona ou saofai i le nofoa ae paga lea e pei o le a galo ia te au nai a tatou fanau. O le ala lava lea o le faalogo mai i upu e pei ua le taugamalie i la outou faafogoga o le naunau i a tatou tupulaga, tamaitai teine o lo o fai mai. O upu masani ia e iloa le tagata i lou aeaie i lou tulaga aua o i latou lava ia e te toe tau mai i ai pe a e sau i lalo.

Ona faauma lea o sa matou tala lau Afioga i le Fofoga Fetalai, e matou te faafetai lava i se avanoa ua aumai e faaali ai se manatu o sui o Tina mo latou nofoa i le Maota. Ma e momoli atu lau faamalulu i a outou Afioga ia e faamalulu atu pe afai ua le tautamalii sa outou faafogoga se tala ua mafai ona fai i lenei itula.

O le tala lea ma le faaaloalo manuia lena itu o le Maota lau Afioga i le Tamaitai Palemia ma le Kapeneta ma Sui Minisita. E faapea foi lenei itu i le Sui Taitai ma sui usufono e agaia le Malo faapea foi e ua mafai ona tatou potopoto i lenei taeao. Manuia lau Afioga i le Fofoga Fetalai, manuia le tapuaiga a Samoa faapea Samoa ua potopoto i lenei aso, e faapea foi le Ofisa o le Fono. Soifua.

FOFOGA FETALAI: Malo faafetai, malo le saunoa i lau Afioga i le sui usufono mamalu o le measili ona taua o lea ua faaleo lou lagona ma lou finagalo o loo faafogafoga foi le paia i le Maota e tusa o lou finagalo faaalua. Malo lava mo lou finagalo ua faaalua i totonu o le Maota.

Pau lava si fautuaga a le nofoa ona e pei e tau maua atu foi i le tau faalogo atu a le Nofoa pe tau lilifa e faapea o se lipoti a le Vaega Faaupufai o lo o talanoaina. E leai o le Lipoti a le Komiti ina ia manino pea le paia o le tatou Maota leaga o la e faafogafoga foi le paia o le atunuu. E faapena a tatou talanoa loa, tatou talanoa o tatou o sui usufono o le Maota. O le mea lea o se fautuaga a le Nofoa ae malo mo lou finagalo faaalua.

E i ai nai sui usufono ia pei ou te tau matau atu pei e tau agai i le... pe a tulai. Ou te fautua atu e i ai lava le taimi o le sui usufono ia ona faatoa saunoa lea ma faamanino. O le fesoasoani atu lena i le tatou fonotaga.

Ia ua avanoa le nofoa, ua avanoa le tatou Maota se tasi o sui usufono. Oi ia, faapea e i ai se isi tamalii e tova ai tamaitai ae ui i lea o le avanoa lava o le avanoa.

Tulai mai lau Afioga i le sui usufono mo Aleipata Itupa i Lalo.

Afioga FAAGASEALII SAPOA FEAGIAI (Sui Usufono Tamaitai - Aleipata Itupa i Lalo): Faafetai lau Afioga Fofoga Fetalai mo le avanoa. E moni ai lau saunoaga sa faapea e i ai se alii e tulai ane ae ona o lea e alu lo tatou taimi. Ona ou faapea atu lea, e faatalofa atu i lau Afioga i le Fofoga Fetalai faapea le Tamaitai Palemia ma le mamalu o le Kapeneta faapea le mamalu o sui usufono uma i lalo ifo o lenei malu.

Ae atonu o le a faaauau loa se manatu e ao lava ona sosoo i maua ma le uso, ona pei o maua lea e agatonu i ai lenei 10% lea na ma ofi mai ai i totonu o le Palemene.

E muamua lava ona ou momoli le faafetai. Faafetai tele lava i nai tina Samoa ia na latou lagolagoina le faaauauina o le 10% e pei ona taua i le lipoti lea e 18% pasene o tina lea na latou lagolagoina le faaauau pea o le pasene o tamaitai i totonu o le Palemene ae lagona foi lota faanoanoa ona o lea e matau atu foi o le tele o nisi o Tina latou te le o lagolagoina Tina i totonu o upufai o Malo. Atonu o le isi mafuaaga taua lea e le o mafai ai ona faaitiitia sauaga i totonu o aiga o tatou Tina, ona o lo o taotaomia pea o tatou lagona, taotaomia pea o tatou manatu i totonu o tatou Aiga, totonu o mea fai a le Nuu aemaise o totonu o le tatou Atunuu.

Atonu o lea e vaavaai atu i le lipoti e 205,000 le aofai o le atunuu a o lea na o le 2000+ lea sa faatalanoaina. Atonu foi o le tele o tagata lea na faatalanoaina sa tataua ona 2 Itumalo a sui o le HRPP, 2 Itumalo o sui o le Faigamalo a le FAST ina ia paleni lelei manatu aua ou te lagona o sui uma ia na faatalanoaina nei o i latou nei po o sui o le vaega o le la Vaega Faaupufai ina ia paleni ai o latou manatu.

FOFOGA FETALAI: O le fautuaga a le Nofoa ua uma ona avatu. Ia faataumamao tatou manatu i tulaga ia, aua o lea e aumai taumate aua o le agaga lava ia o le Maota ia aumai manino, aumai manino pea a outou saunoaga ae aua le tuuaia se Vaega Faaupufai i o outou finagalo. O lo o manino a le tala o le Nofoa e pei ona avatu ina nei o tatou tuuaisese ae le o faamaonia lena tulaga. Ae faaauau le saunoaga a le sui usufono mamalu.

Afioga FAAGASEALII SAPOA FEAGIAI: E faamalulu atu lau Afioga i le Fofoga Fetalai, ae o se manatu lena ona o le... Faafetai lava i le Lipoti na tuuina mai a o lo o i ai sui mamalu o le Palemene mai Tasmania lea sa i ai Sui Tamaitai. Atonu ua malamalama uma sui nei i le mea lea o lo o tulai mai. O lo o i ai foi ni Sui Usufono Tamaitai lea sa i ai i le aso ananafi o lo o i totonu o le

vaega lea o le CWP o i latou nei o lo o faasoasoina mai le tamaoiga e ala i le atinaeina o Tina. O lea ua latou molimauina e le o lagolagoina e le tatou atunuu ia Tina i totonu o Samoa.

O lea foi la ua i ai le latou... [.....].
O le mea foi la lea e popole ai se taofi ona o lea...

Afioga Hon Tuala Tevaga Iosefo Ponifasio (Sui Palemia): Lau Afioga i le Fofoga Fetalai...

FOFOGA FETALAI: Malie le sui usufono mamalu, ona o lea ua faauilavea le Afioga i le Sui Palemia. Se i tulai mai lau Afioga i le Sui Palemia.

Afioga Hon Tuala Tevaga Iosefo Ponifasio: E faamalulu atu ona ua tulai atu e faauilavea i le saunoaga. O manumanuga lau Afioga i le Fofoga Fetalai ona o lea ua taua le faasoa foi ma nai Malo a lau Afioga, Malo a le Palemene o lo o faapena ona auvaa mai totonu o le tatou atunuu. O lea foi ua aumai le faaopopoga o le saunoaga o lea foi ua fai mai o le a o talai atu i fafo le tulaga e le o lagolagoina e le tatou atunuu le 10% mo tamaitai.

E fautuaina e tauala atu i lau Afioga i le Fofoga Fetalai ina ia aveese nei upu ma totonu o le tatou faamaumauga, e manatu i le aafiaga o le implication o tatou Malo. O i ina o lo o i ai le manumanuga lau Afioga i le Fofoga Fetalai. Faafetai ma le faaaloalo lava.

FOFOGA FETALAI: O le fautuaga lava lea. Faafetai i lau Afioga i le Sui Palemia, i le sui usufono mamalu. Ia o le mea lava lea se i tau faatoatoa lelei tofa ma le... ae manatu foi leaga o lea ua faalele saunoaga ae o lo o faamaumau foi tulaga ia, ma e pei ua tuuaina le atunuu atoa i lau saunoaga.

O le mea lea ia tofa malie o lea o le a faatonu le Failautusi e tuu ese upu ia e pei ona saunoaina. E lelei ona agai sao pea i le tatou mataupu ma le Komiti e pei ona i ai i totonu o lo tatou lotoifale le anoliu o le mataupu ona manino foi lea. Ma le agaga faaaloalo lau Afioga i le sui usufono mamalu e faauma mai le saunoaga.

Upu na faatonuina e le Fofoga Fetalai e aveese mai faamaumauga o Saunoaga a le Sui Usufono Tamaitai – Aleipata Itupa i Lalo: *[sa faasoa mai lo latou lagona ananafi, o le a o atu o le a talanoa i isi vaega o totonu o le Faalapotopotoga lea o le a see ese latou o le a le toe maua se faamanuiaga i totonu o Tina ma Tamaitai, ona o lea ua latou matauina le lē faatauina ma le lē amanaia o Tamaitai i totonu o Upufai o le Malo]*”.

Afioga FAAGASEALII SAPOA FEAGIAI: Faafetai lau Afioga i le Fofoga Fetalai. E faamalulu atu lava ona o ni upu foi sa... ae ona o le mea moni lava

lea na tupu e faamalulu atu ai. O le faaauauina o se manatu ona o le mea lava lea o le 10%. Na o le fautua atu ai i le mamalu o le tatou Palemene ina ia outou amanaia e pei foi ona saunoa le sui usufono tamaitai le Afioga ia Aliimalemanu ina ia faataua avanoa ma tatou fanau, aemaise foi o nisi o lo o fai ae, ia maua avanoa tutusa i totonu o upufai a le tatou Malo e pei foi ona i ai nisi o Tina ma Tamaitai i totonu o Faauluuluga o Matagaluega. Ia o le tulaga tonu lea i le amanaia o aiatatau ma aia tutusa i totonu o le tatou atunuu.

Ia, e le tele naua se upu, pau lava le mea e faamalosi atu foi ia i tatou Tina ma tuutuualalo atu foi ia tatou Tina a o si o tatou atunuu ina ia tatou tutufaatasi ina ia tatou faaeaea ia i tatou ina ia maua ai le manuia o le tatou atunuu. Aua e pei o le tele lava o Tina o lo o tele foi matatia, tele manatu lelei aua le atinaeina o le tatou atunuu.

Ia faamanuia tele le Atua i lau Afioga i le Fofoga Fetalai aemaise o le Palemia ma le mamalu o le Kapeneta, faamanuia foi i sui usufono uma i lalo ifo o lenei malu ma i latou uma ua molimauina lenei aso. Ia manuia le usugafono.

FOFOGA FETALAI: Malo faafetai. Malo le saunoa i lau Afioga i le sui usufono mamalu. Faafetai foi mo le sao o lea ua tuuina mai a o lea e faafogafoga le Taitaifono faapea foi le paia o le Maota. Malo faafetai.

O le avanoa lenei mo se tasi o sui usufono. Se i tulai mai le sui usufono mo Salega 1.

Afioga FEPULEAI FAASAVALU FAIMATA SU'A (Salega 1): Faafetai i lau Afioga i le Fofoga Fetalai mo le avanoa. E faatalofa atu foi i lau Afioga mo le taitaiina o le tatou fonotaga i lenei aso, vaeane, le afio o le Afioga i le Tamaitai Palemia ma le mamalu o lana Kapeneta aemaise foi o le lagolagosua a Minisita Lagolago. E faatalofa atu foi i la itu o le Maota i lau Afioga i le Taitai o le Itu Agai ma sui usufono uma o le Maota aemaise foi Ofisa Sili o Pulega o Matagaluega, lau Afioga i le Failautusi o le Fono ma le mamalu o le Matagaluega.

Ou te tulai i lenei vaega o le aso e fai se lagona foi o lenei itumalo e ala i le Lipoti ua faitauina foi ma le manino i le aso ananafi ma le po anapo, lea foi ua tolaulau e le afioga i le Taitaifono ua manino ma malamalama vaega uma o lo o teena ma vaega o lo o i ai le taliaina e le Komiti ma vaega o lo o i ai sa latou fautuaga.

E le tele se tala a lenei itumalo i le Lipoti pau lava lea le lagolago i nisi o vaega ae i ai nai vaega ia e tau avatu ai se lagona, ona o le tulaga lea e aumai ai le teena o manatu faapea o agavaa o le Sui Tauva, Fautuaga 5.4.3 - E le agavaa se matai o se isi afioaga, po o se isi nuu po o se isi itumalo ona tauva i se isi itu itumalo.

Lau Afioga i le Fofoga Fetalai e fia maua se malamalamaaga i lau afioga i le Taitaifono i le tulaga lea ua agai i ai le vaevaeina o Itumalo Tu Taulaga ona e i ai afioaga o lo o i ai matai faapea o lo o nonofo ai, ona agai mai lea o suafa matai ia pe le o i la e ono maua mai ai se avanoa o le vaega lea, ae taua le aumai o se faamalalamaaga mo le vailiu lea faamolemole.

O le tulaga i le 10%. I le lagona o lenei itumalo mai le amataga i le faitauina o le Lipoti ma le toe vaavaai agai tua i le afuaga o lenei Tulafono o le 10%, o se tulafono sa lelei ma sa matau ai foi i le Paeaiga 16 e le i i ai lava se mea na tupu. Pe a matau ma o matou faalogologo ma matamata i saunoaga i lena foi Paeaiga a atoa loa ma le 5 o tamaitai ua le aoga le tulafono o le 10%. Peitai ua feteenai ma lenei Paeaiga ua atoa le 5 o tamaitai i le Palemene ae ua faaoga loa le tesimale, pei o le vaiiu lea, o lea ua feteenai ai manatu ma lagona o lenei Paeaiga i le faaogaina o le 10%. Ae i le vaai ma le matau a lenei itumalo sa lelei mai lava le faatinoga i le Paeaiga Lona XVI. Na atoa loa le toa-5 o tamaitai leai se toe manatu e faaopopo se tesimale, ae ina ua oo mai i le Paeaiga lenei ua faamalieina le 10% ae ua laaloa i le tesimale. O i ina tonu lava ua manunu ai loa le toau ma afaina ai loa le 10% a nai tina. O lona uiga e le i mautu lelei le faatulagaina o le 10% a tina. Aua a na mautu lelei e le mafai ona toe lotea se tesimale i lenei Paeaiga. O lenei la ua tupu mai loa le 10% i le Paeaiga lenei ua fai umi umi ai loa le fetaufaoga o Faigamalo mai le amataga, lea ua tautuuai o ai e sa'o o ai e sese. O ai e sa'o lana matematika a o ai foi e sese lana matematika. O ai na faia le Tulafono o ai foi e fesiligia le Tulafono a o se lagona lea o le itumalo o Salega 1, a na faapea e taoto pea le taotoga o le 10% sa faaogaina i le Paeaiga 16, e o'o mai le Paeaiga lenei, e talitonu lenei itumalo e leai se feteenaiga...

Tofa Lealailepule Rimoni Aiafi (Faleata 3): Lau Afioga i le Fofoga o le Fono...

Afioga FEPULEAI FAASAVALU FAIMATA SU'A: E pei o le tulaga lena i lo'u manatu ua aumai ai le Lipoti a le Komiti i le 10% ua feteenai...

FOFOGA FETALAI: Malie le sui usufono mamalu se i... e i ai se mataupu...

Tofa Lealailepule Rimoni Aiafi: Ia faafetai lau Afioga i le Fofoga o le Fono ona...

FOFOGA FETALAI: O le a le mafuaaga...

Tofa Lealailepule Rimoni Aiafi Rimoni Aiafi: Ona o lea sa faapea e na o le pa'i o le sui usufono lea i le 5%, le 10% ma le numera 5 ona faasee lea. Manatua foi lau Afioga la e galo i le sui usufono o le taimi lea o 49 sui usufono o le Palemene.

FOFOGA FETALAI: Ia lea...

Tofa Lealailepule Rimoni Aiafi Rimoni Aiafi: Taimi nei lea ua 51 sui usufono o le Palemene.

FOFOGA FETALAI: Ia lea ua maua atu lou finagalo.

Tofa Lealailepule Rimoni Aiafi: Le mafuaaga lena ma lo'u faaaloalo lava, Faafetai.

FOFOGA FETALAI: Faaauau le saunoaga a le sui usufono.

Afioga FEPULEAI FAASAVALU FAIMATA SU'A: O le manatu la o lenei itumalo e le teena e le itumalo lenei le 10% mai le amataga ae ina ua feeteenai, o le sui lava lenei ou te tautino atu ua teena loa le 10% ona ua faaoga le tesimale.

O le isi itu e manatu i ai lenei itumalo ua faaseseina ai ma le vaevaeina o matematika i totonu o faleaoga. O totonu o le faleaoga i lona 10% o le 51 o le 5 ae a oo mai loa i le tatou Maota Fono ona sui loa lea o fuainumera.

I le aotelega o se manatu o lenei itumalo matou te lagolagoina ai vaega uma lava o lenei Lipoti...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai e tulai atu ma le faaaloalo mo se avanoa...

FOFOGA FETALAI: Ia malie lava le sui usufono o Salega se i fai atu se tala a le Nofoa. Ou te fesoasoani atu i sui usufono mamalu o le Lipoti lea e talanoaina i le taimi ona toe oo lea i le Pulega Faatonu e tapena mai nisi tulaga ona o'oo'olea o tou saunoaga i tulaga auiliili faapena. E fautuaina e le Nofoa ina ia agai sa'o pea i le tatou Lipoti o i ai i le taimi lenei a o le faalauaitelina o tou finagalo e le i o'olea i le taimi e tusia ai ni Tulafono, pe a i ai ona faatoa faaauau lea o tou saunoaga. Faapupuu mai a tatou saunoaga. Atonu lea ua maua mai lau afioga i le Sui Taitai...

Tofa Hon Lauofo Fonotoe Nuafesili Pierre Lauofo: Ua lelei faafetai. Leai o le mafuaaga lava o lo'u tulai, ona o au o le tasi sui o le Komiti, lea e mafua ai na ou tula'i. Na ona ou faamanatu atu o mataupu nei ua uma na fai i ai faaiuga a le Faamasinoga o la e la ua manino lelei ma taoto le tulaga e pei ona i ai. Ae fuafua aua o saunoaga tuulafoa'i faapea, faapea mai ua sese uma ai ma matematika a aoga, leai e le o le sa'o lena e leai ni mea faapena o tupu. Ae manatua lelei e lau afioga i le sui usufono mamalu o le faatauaina o tamaitai lea e talanoa ai i le 10%. O le mafuaaga foi lena lea foi ua ou manatua o le aso a taeao le Aso Tofi o le aso lea e laei ai ofu uli e faamanatu ai nai tina ma tamaitai ia tetee atu ai i le sauaina o tamaitai.

FOFOGA FETALAI: Ia lea ua maua atu lou finagalo.

Tofa Hon Lauofo Fonotoe Nuafesili Pierre Lauofo: Aemaise i latou o lo o faia pea lea amio o le lima pa'aa i tamaitai o le atunuu.

FOFOGA FETALAI: Ia ia lea ua maua atu le finagalo o lau afioga i le Sui Taitai...

Tofa Hon Lauofo Fonotoe Nuafesili Pierre Lauofo: O mea na e tatou te manatunatu i ai.

FOFOGA FETALAI: Lau Afioga i le Sui Taitai, ia e manatu o lea ua tulai mai lau afioga... o outou uma a o sui o le Komiti o lea ua saunoa se tasi o sui...

Susuga Maulolo Tavita Aмоса (Sagaga 2): Lau Afioga ua maea na saunoa atu se tasi o sui o le Komiti a o le mea e tatau ona faasa'o faamolemole. O le saunoaga lea faapea, e ese le matematika i totonu o potu aoga ese iinei. Ou te tulai atu e le sa'o lea mea. A moomia se fesoasoani vaai le mea lea tau o le less than or equal to sign, ona e malamalama lea i le mea lea out e tautala i ai.

FOFOGA FETALAI: Ia lea ua maua atu...

Susuga Maulolo Tavitia Aмоса: Ae aua le aumaia faapea leaga o la e faafofoga mai faiaoga e le sa'o lea mea.

FOFOGA FETALAI: Ia lelei lea ua maua atu, lea ua maua atu lou fingingalo... E avatu fautuaga i le sui usufono mamalu, ua tele fautuaga o lea ua tuuina atu...

Afioga Sulamanaia Fetaiai Tauiliili Tuivasa (Vaimauga 1): Lau Afioga i le Fofoga Fetalai mo le faasaoina o le taimi o le sui usufono mamalu. E le o a'u o se sui o le Komiti ae na o se fesili a leaga e faaaloalo pea...

FOFOGA FETALAI: Ia se i aumaia lau fesili, po o le a lau fesili...

Afioga Sulamanaia Fetaiai Tauiliili Tuivasa: E manaia le saunoaga a le Taitaifono a lenei Komiti e pei ona taua le vaegamea po o le tesimale. O le fesili la a le Vaimauga, o le tesimale o se a? O se lima po o se tagata e pei o le uiga lena o le faafesili, po o se mea faapena leaga o lea e fai mai le sui usufono o le 5.5. O le a la le point lea? O se tagata ola po o se fasi laau?

FOFOGA FETALAI: Ia lea ua maua atu, lea ua maua atu...

Afioga Sulamanaia Fetaiai Tauiliili Tuivasa: Leai na o le fia fesili lava i le sui e faamalamalama mai le tulaga lea i le...

FOFOGA FETALAI: Saunoa mamalu, saunoa mamalu le sui usufono, ua tau la'a foi le sui usufono i tulaga le talafeagai. Lau Afioga i le sui usufono mamalu o lea ua e maua mai le fautuaga a le Maota.

Afioga FEPULEAI FAASAVALU FAIMATA SU'A: Faafetai mo le avanoa i lau Afioga i le Fofoga Fetalai. Ona ou oo mai lea i le vaega lea o le vaega mulimuli o le manatu o lenei itumalo. Ona faapea lea o se lagona o le aotelega o le manatu o lenei itumalo e lagolago i le galuega fita a le Komiti e tusa ma le Lipoti ua tuuina mai aua foi le fautuaina o le tatou Palemene, aemaise o le Lipoti. Ia manuia tele fonotaga i lenei aso. Soifua ma ia manuia.

FOFOGA FETALAI: Malo le saunoa i le sui usufono mo Salega 1. Ia, ua maua le avanoa o le tatou Maota.
Tulai mai le Sui o Satupaitea.

Afioga Hon LAUTAFI FIO SELAFI PURCELL (Satupaitea): Faafetai i lau Afioga i le Fofoga Fetalai mo le avanoa. A o le i faia se tala e faatulou foi i le paia o le tatou Maota i le afio o lau Afioga i le Fofoga Fetalai, afio o le Tamaitai Minisita ma lau Kapeneta, Sui Palemia ma le mamalu i Minisita Lagolago. E faapea foi lenei itu i le afio atu a le Sui Taitai ma sui usufono o lenei Maota. E faatalofa atu i Ofisa Sili o Pulega o Matagaluega, faamalo le onosai, malo le tauata'i i le tatou galuega.

Lau Afioga i le Fofoga Fetalai a o le i faia se tala e uiga i le Lipoti e momoli atu lava la'u faafetai i lau Afioga faapea foi le tatou Maota nei i le tofia foi lea o lo'u nei sui faatauavaa e avea ma se tasi o sui o le Komiti e pei ona iai o Tulafono Tumau, Mataupu tau Faiga Palota, faafetai tele le faaeaea. O lo o talanoa mai lava si ou itumalo, malo faafetai na ua faaeaina oe, o le faaeaina foi lena o le itumalo. E momoli atu la'u faafetai o Satupaitea ia e galue a so o se mea e tuu mai ai ready to serve, ready to act all the time.

Lau Afioga i le Fofoga Fetalai ona ou oo mai lea i le tatou Lipoti. E momoli la'u faafetai, i le Taitaifono ma le Komiti, matagofie le Lipoti na tolaulauina ananei le taeao. Alu foi le po ananafi, po anapo o ou faitau i a latou suesuega na fai. Ou te momoli lava le faafetai i le Komiti, ona ua latou le taliaina le tele o mea ia sa tuu mai... mea tonu lava ia o i na ou faapea ai o lea o le a aafia ai lo'u itumalo i nisi o fautuaga nei. Sa ou talanoa i lou itumalo e faamalie i ai a outou faalogo atu ua ese le alu a le tou sui usufono pe a o'o i le tulaga lea ua talia e le Komiti le fautuaga lea e sau e lavea ai Satupaitea, vaelua o isi i o ae o isi i i,ae tu'u i le ogatotonu Satupaitea. O le pule lea e tasi le pule ae lea pei o le a vaevae i fautuaga a le Komiti lenei Suesue, Komisi Suesue faamalie atu e le o le Komiti, O le Komisi lea e... ae faafetai ua le taliaina le tele o nei fautuaga. Aua o fautuaga nei na ou faitauina uma lelei a na ou faitaua le 3 o tusi nei ua confuse ai lota mafaufau, ou faapea na o le vevesi o le atunuu le mea e maua ai i ituaiga Komisi nei O le 6 ai lea o Komisi e le i i ai a se Komisi ua ou fiafia i se latou Lipoti, e pei o tupe alu a i lou a'u a ia... o tupe alu foi ia, e tau lava ina... o la e fai se Komisi a o suesuega lava ia e toe foi mai lava i le tatou Maota, a fai lava e tatou tatou Komiti Faapalemene, atonu lava... o lou lava manatu lena, ae faafetai i le Afioga i le Taitaifono ma le Komiti ona o fautuaga matagofie. O isi lava fautuaga uma ou te le tetee i ai, e i ai ni manatu, atonu o tulaga lava faapea. O le faiga lava lenei o le tatou Palemene ma tatou faigamalo,

o lea taimi toe iloilo, o lea taimi toe iloilo. Leaga e agai i luma le lalolagi, o lea foi e agai i luma le olaga o tagata Samoa, e le tumau i se mea e tasi. O lea la sa aoga i le 5 tausaga talu ai. A toe tilotilo i ai, e tatau ona fai se teuteuga, ia ogatasi ma le taimi, lea taimi i lea taimi. O lea foi la e i ai le Lipoti a le tatou Komiti, e tatau foi ona toe review, toe iloilo nisi o vaega o lo o tatou galulue ai i lalo. Pau lava lea o le mataupu lau Afioga, e fia oo i ai se leo o Satupaitea, na o le 10% leaga sa ou i ai i le taimi o le Kapeneta na faatulai ai le mataupu leni. E le faigofie la ia te au le fautuaga a le Komiti lea ua aumai...

E le faigofie la ia te au le fautuaga a le Komiti lea ua aumai e aveese le 10% ona o ni iloiloga i ni manatu o le to'a 398 tagata. E le o se size lea o se sample, sa tatau ona tilotilo i ai ma silasila i ai le Komiti, e le o se size lea. Ia silasila la i ai? A o lea o le a... fai mai ua mafuli i ai i latou sa faatalanoa, sa tatau ona toe su'e nisi manatu. A maua se 10% matua manaia lava, aumai lea o le sample lena i luma e ono fai i ai se fuafuaga. A o le fai lea i le numera lea na... e lagona ai le... tulaga foi lea, ia e 240 i latou sa faaali o latou manatu, 81 e faapea ia faatutusa ia... faapea la e aveese le isi vaega foi lea e pei e maua ai le faamanuiaga o Tamaitai. E pei o le mea lea sa tau tulai mai ai le Minisita e ese le alu i le Palota, ese le alu i le 10%, ua lua, double tip la Tamaitai o le...

Lau Afioga i le taimi na talanoaina ai le mataupu leni ona o le tele o le faataua e le Lalolagi, ia aafia Tamaitai i totonu o Palemene o le Lalolagi. O tatou lea tatou te i ai i totonu, e le faapea e tutoatasi a Samoa, e leai, we are part of a community now, Communal World, tatou te i ai uma i totonu. E le faapea tatou te o saina Maliega, na o mea a tatou te mananao ai, tatou te o loa saina i o tatou aao, e o lo o usufono i totonu o Feagaiga nei, ua saisaitia ai tatou.

E tatau ona tatou faatino mea ia tatou te sainia, lea la ua tatou sainia e faamalosi le i ai o Sui Tamaitai i totonu o le Palemene. Involvement of Women in Parliament and be very active i le faiga o ni faiga ia taunuu ai le faaupuga lena. E le na ona faalele a o le upu, vaeane lau Afioga, e tatau ona faatino.

O le a la le mea e faatino e Samoa? Fai loa se faiga, aua o le taimi lena pe na o le toalua sa seei mai, pe na o le toalua, taitoatasi Tamaitai sa i totonu o le Palemene ae o le toatele a o Alii. O le mea lena na taumafai ai e fai se faiga. Tulai mai ai lea o le formula lea, a maua se 10% o tamaitai, 10% o le numera o le Palemene, 10% percent of the total number of Parliamentarians should be women. O lea lava na lelei, lea foi na ta'ua e isi sui usufono, se e faaamuia mai tagata ia Samoa. O fonotaga foi sa ta alu ita i ai, e faamanuia mai i le toa o Samoa ma le mea ua fai, o le a faata'ita'i mai ai foi latou, faiga o se faiga ina ia uunai ai avanoa mo tamaitai e nonofo i totonu o le Palemene.

O le tulaga ua tulai mai ua faaliliu se faiga lelei sa taumafai e fai, ua pei o se mea e le lelei. We have turned the 10% into a mathematical situation and it turned to be a mathematical nightmare. The whole point of 10% lau Afioga, is a moral solution to a very unfavorable situation sa i ai le Palemene leni o Samoa, leai ni Tamaitai.

O lea la ua taumafai atu e fai le faiga lea, a o lea ua pei o se mea leaga le mea lea ua tupu. A na le tulai mai lava tulaga ia e manino a le faiga muamua. E le o le taimi muamua lea, lea sa i ai le tamaitai muamua na fai, leai a ma se pisa, i

le taimi lena o le 5% o le aofai o le Palemene. Si'i i luga i le 51 e si'i foi la le pasene e le faapea e si'i i luga le numera ae tumau ai pea i lalo, leai. Atonu o lea na toe faamanino mai, ta te musu e ta'u atu...

Afioga Hon Toelupe Poumulinuku Onesemo (Minisita mo Fesootaiga ma Faamatalaga Tekonolosi): Faamolemole lau Afioga pe maua se avanoa...

Afioga Hon LAUTAFI FIO SELAFI PURCELL: Ta te musu e toe ta'u atu ia tulaga na oo i ai.

FOFOGA FETALAI: Malie le sui usufono mamalu sei tuu atu i le faauilavea a le Afioga i le Minisita o Fesootaiga. Se i tulai mai lau Afioga i le Minisita.

Afioga Hon Toelupe Poumulinuku Onesemo: Faafetai. E leai se agaga e faalavelave i le sui usufono mamalu, matagofie le saunoaga a le sui usufono o Satupaitea. Pau a lea o si mea itiiti lea e lagona e... ona o lea na saunoa, o atunuu i fafo o lo o faamanuia mai ma faaamuia mai. O le tatou atunuu e faavae i le Atua, na o le Atua a e faamanuia ia Samoa ma e nanau foi i ai le tatou naunautaiga, e faamanuia mai ia Samoa. A o lea o le a amata ona politicise ae leai se sui usufono e le taua ona tuafafine, a ua amata loa ona politicise ia pei o lea o le a vaevae ai tatou tagata ma le faaaloalo.

FOFOGA FETALAI: Ia malo, faafetai le fesoasoani foi i le sui usufono, ia ma e fesoasoani atu foi i le sui usufono ua pei ua tau mafamafa, faapea o se mea leaga. O le upu lea e le talafeagai i le faafogafoga a le Maota ma le atunuu, ne i te i ua faamamafa i le saunoaga a o lea lava ua maua le agaga. O le agaga ua maua, a o le upu ia pei o le itu lena e fesoasoani atu ai i le sui usufono mamalu.

Afioga Hon LAUTAFI FIO SELAFI PURCELL: Faafetai. E faamalulu atu pe a sese se upu ua alu atu i le faiatuga o le tala, o le mea foi lea e fai a ma ou oso i le Gagana Faa-Peretania, e faatulou atu, e malamalama ai lo'u manatu. It's becoming like an unfavorable situation, a o le mea ia na sau le amataga o se mea lelei, o se mea lelei ina ia maua ai se faalaugatasia o Tamaitai ma Alii i totonu o le tatou Palemene.

A o lea ua tulai mai, ia lea ua faapea e aveese. Ou te le taliaina le vaega lea o le Lipoti. Pau a lea o le vaega o le lipoti ou te le taliaina le latou fautuaga, faapea e aveese ona o manatu o tagata ia e 240 lea na lotea le mataupu lea. Tatou o e fai se faiga ina ia faamalie uma ai itu, se formula e mafai ona tatou faapea e le mafai ona lepetia se formula lea. A leai se formula e sili atu i lo le mea lea i ai nei, lau Afioga, ou te tatalo atu lava au ia, tatou o pea i le 10% lea, i le calculation lea i ai unless somebody comes up with a better idea e suit ai le tatou atunuu. A o le mea faapea, oh too hard let's put it away it's not going to work, ma e leai se tatou mea e maua. O tatou o Taitai o le atunuu, let's make decisions. O tatou o Taitai, fai e tatou faaiuga. Afai e le fetai, fai se faaiuga i le 10% ae ia tumau le i ai o le faataua o le 10% o tamaitai i totonu o le Maota

lenei, e toalima, toaono. Afai foi e si'i atu i luga, toafitu, lea o le a 55 ia... pe a fuafua, 55 sui usufono i lalo o le faaiuga lea o le a sau nei, e sii foi i luga le... o le 6 lea o le a tatou o'o atu i ai.

Ia o le tuualalo a le sui usufono o Satupaitea, ia faamalo i le Komiti ae na o le pau lea o le tulaga ou te le taliaina, le le atoa o le 10% o tatou tamaitai.

FOFOGA FETALAI: Toe 2 minute o le sui usufono.

Afioga Hon LAUTAFI FIO SELAFI PURCELL: Ia ua uma foi se leo o Satupaitea. Faafetai i lau Afioga. E faamalulu atu, a i ai foi se upu ua sala ia po o se gagana foi ua le tautamalii, ia o le taumafaiga lava a Satupaitea ia malamalama mea o lo o tuli mai a'u e lo'u Itumalo e fai. Ae faafetai i le Komiti ua leai a se mea o lotea ai si ou Itumalo, leaga o Satupaitea e to'a a le tai a Satupaitea ia. Faafetai i lau Afioga i le Fofoga Fetalai.

FOFOGA FETALAI: Malo faafetai saunoa, malo foi mo le sao lea ua faafofoga ma le manino le Taitaifono ma le paia o le Maota. Malo faafetai.

Ia se i tulai mai le sui usufono o Siumu, lou avanoa lenei lau Afioga.

Tofa Hon TUUU ANASII LEOTA (Siumu): Faafetai i lau Afioga i le Fofoga Fetalai ua maua foi se avanoa. Ae o lenei lava e femusua'i mai nai o'u uso ia pe fai ni matou lauga faataupou, ae ou fai atu, o a na lauga faataupou o tatou ua leva na tatou matutua.

Ia lau Afioga i le Fofoga Fetalai, faafetai. E tulai atu ma lou faaaloalo i lenei itula o le aso...

FOFOGA FETALAI: O lena e sao lelei a lau Afioga.

Tofa Hon TUUU ANASII LEOTA: E faatalofa i lau Afioga i le Fofoga Fetalai aemaise le paia maualuga o le Maota lenei. Afio lau afioga i le Tamaitai Palemia, afioga i le Sui Palemia, afioga i alii ma tamaitai o le Kapeneta, afifio foi afioga i Minisita Lagolago. Afifio foi le Itu Agai, le Sui Taitai ma le mamalu o sui usufono o le Palemene aemaise foi o matou nei o sui usufono fou. O lea ua ou tulai atu, o lea ua ou muamua tamua, o matou o sui usufono o le FAST.

E fia fai foi se manatu puupuu lava i le Tulafono e pei ona taatia mai nei, masalo o lea ua maua le avanoa e momoli ai la'u faafetai i lo'u Itumalo i le Faiga Palota na mavae atu nei aemaise foi o le tapuaiga a Samoa, afioga i Le Ao Mamalu o le Malo ma lau Masiofo, Sui o le Fono a Sui Tofia ma lou Faletua, aemaise foi o le Afioga i le Faamasino Sili ma le mamalu o le Faamasinoga, aemaise o Samoa i ona tulaga faalupelupeina o le a le o'o i ai se faamatalaga.

Ae, o lenei itula ou te momoli atu lau faafetai ma lau faamalo i lou Itumalo, le paia ia Sa Asomua ma Aiga e Lua, fetalai ia Tuuu ma le Aiga Sa Tuuu o le Falelua o tulafale, Fofoga o Alataua, Utaileuo ma le mamalu i le faletolu. Aemaise foi o le tapuaiga a le aufaigaluega paia a le Atua o lo o faapena ona tatalo aua se manuia o le tatou Itumalo, faamalo tatalo faafetai le tapuai. Ia

aemaise foi o le tapuaiga mau i Faletua ma Tausi, Saoao ma le mamalu o le tatou Itumalo e le gata i Samoa nei, a o so o se tafa o le lalolagi i ona itulagi e fia o lo o faapena ona taputapu mai ai. Malo, faafetai mo talosaga. E talitonu sa tele lava lo outou sao e ala mai i fautuaga i o outou aiga isi o tatou Itumalo ina ia lagolagoina le tatou faamoemoe pei ona tatou toe tulai mai ai ma le manuia i le faamoemoe. Faafetai.

Ia, o se faamatalaga lea ma le faafetai tele lava i le tatou Itumalo, faamalo o lea ua outou toe tusiaa mai, ia e fai ai lo'u faatauva e fai ma sui usufono o le tatou Itumalo i le Palemene e faaleoina so outou finagalo. E pei ona outou silafia mafuaaga o lo'u tulai ese o le naunau ina ia manuia le tatou Itumalo, manuia le atunuu, manuia le Malo, ia o le manuia foi lea o tatou aiga. Faafetai tele.

Lau Afioga i le Fofoga Fetalai e momoli lau faafetai i le Afioga i le Taitaifono ma le Komiti atoa mo le Lipoti ua maioio ona faataoto mai. Ua matagofie nisi o vaega ua tuuina mai, e lagona ai le fiafia ma le... aemaise a o le vaega lea i le toe faataotoina o Itumalo sa faataoto ese mai i le Nofoaiga talu ai, aemaise lava o Saleaula ma Salamumu ona o au foi o le tasi o matai o le Itumalo lea. Sa i ai lava le tatalo ina ia toe faafoi i tulaga tonu e tatau ona taoto ai, aua e moni lava o Saleaula o le tasi o Pule aua tatou i Puleono i Salafai, faafetai. Aemaise foi o le afioaga o Leauvaa, ia ma tulaga ua aumai ai le latou fautuaga i mea ua tatau ona toe faataoto i ai le tatou atunuu, i mea sa tatau lava ona taoto ai. Sa le tatau ona toe suia nei tulaga, lea ua tatou penei ai.

E momoli atu le faamalo ma le faafetai i lau Afioga i le Taitaifono ma le Komiti i tulaga uma e pei ona faataoto mai ai. Ae pau lava le mea ou te fia talanoa ai lau Afioga i le 10% lea, ou te lagolagoina le fautuaga ina ia faataatiaese. Masalo o le palota i le 1996, o le tele ia o tina ma tamaitai na manumalo mai i le Nofoaiga lea masalo pe toatolu nai tina na toe faaleaogaina latou nofoaiga ona o tagi i le Tulafono. O lea la... I lou lava manatu e tatau ona tatou agai e teuteu le vaega lea. Afai ae malo mai se tina, teuteu faapea, a malo mai le tina aua nei i ai se tagi e faia i ai. O mea ia tatou te agai i ai a o le mea lea ua aumai, e pei o fonotaga nei, o outou fonotaga Commonwealth Malo o le Taupulega o atunuu nei sa i lalo o Pulega faa-Kolone e aafia ai Initia, Pakistan ma le tele o atunuu nei o Aferika.

Sa ou i ai i le Faigamalo i le Nofoaiga lea 15, o lea e i ai nisi sa matou i ai, sa ou i ai i le Faigamalo. O a'u le tasi o sui sa ou teena le Tulafono lenei ina ua aumai. O lou la teena e le o i ai se pa puipuia o Tina ma Tamaitai i le Faiga Palota a Samoa, o lo o avanoa Tina e tutusa uma. Ae o le mea lea ua aumai i i le mea lenei o le naunautaiga o atunuu ia. Sa matou i ai i fonotaga a atunuu nei lau Afioga i Initia ma Pakistan, Afghanistan ma atunuu tetele foi ia o Aferika. O le toatele o atunuu nei e latou te le amanaia Tina, e matua le amanaia lava Tina ae a vaai i le 30% lea e tau mai i i i Initia ua pasia, o la e foi e aumai le upu e na o le pasia ae le o faatinoa. O Samoa e tutusa lelei tina, o tatou foi e faaaloalo uma i tatou Tina, a tatou o i Palota o la e tutusa ae pau lava o le atunuu ma Itumalo o tagata lava latou te filifilia ae pau lenei o le manatu i ai.

A o le agaga lenei o atunuu nei e finau mai ina ia tele ni latou Tina i totonu o le Palemene e finau ai le le amanaia o latou e atunuu nei. A o tatou lava pe leai se tina o lo o lava finagalo o le mamalu o le Palemene e faataua ai Tina, ae pau

lava lena o le mea lau Afioga i lo'u talitonuga i ai, sa ou tetee i ai i le 2015 sa upuia ai au, na ou faaaogaina le faleaitu a Petelo ma Sumeo lea e i ai tagata o lo o molimau faapea ua ou faaaogasese le faleaitu lea, e faapea ai o le fasipusi ae le o se pusi atoa. O lau la faauigaina o le mea, a sau se sui e sau i le nofoaga lea, tulou lava Afioga i Tamaitai o lo o faaaoga i ai le mea lea, e le tataua la ona soona avaavau ma soona finau leaga i te i ua faapea atu le sui lea se faamolemole e te le i sau i se palota atoa.

O le uiga o lau faamatalaga. A o lau faamatalaga lau Afioga sau se palota atoa o le uiga lena o lau faamatalaga. Ao lau faamatalaga lau Afioga leai ou te ava tele iTina ma Tamaitai, ou te le o faapea atu ae na o le pau la lena o le mea e fai. O Tina pe salusalu Tulafono lava aua ne i toe tali se isi i Tina, ona omai uma lea o Tina i totonu o le Palemene. Ma lou faaaloalo. Ia manuia le Fono.

FOFOGA FETALAI: Malo faafetai mo lou finagalo faaalua ma tuusao foi lou finagalo e tusa o le tatou mataupu. Malo lava faafetai. Ua avanoa le tatou Maota.

Ia se i tulai mai le sui usufono mo Palauli 3. Tulai mai Lagaia le sui usufono mamalu.

Tofa LAGAAIA TIATUAU TUFUGA (Palauli 3): Faafetai lau Afioga i le Fofoga Fetalai mo le avanoa, ae ou te manatu o le a le toe paopaoina paia ma mamalu o le aso, aemaise paia o le Maota lena o Samoa ma lana Palemene. E talitonu foi le faamoemoe o lea sa olotu avefeau le tootoou o lena aso, ua maea foi ona papae ti'a i ulupaga e pei o le faiva i malae. Ua maea foi ona tapui le lagisa aua lo tatou va tapu ma le Atua lea sa fitaituga i ai lau Afioga i le Fofoga Fetalai. Ia, o le agaga moni lea ave le tatou faamua i le Atua ma Lona alofa faasoa.

Ae o le avanoa e momoli ai lau faafetai tele lava i le Taitaifono ma le Komiti e ana le lipoti i le aso. Ua faamalieina lava lou sui usufono. Faafetai ua outou le vaai faai'a o tainefu a ua outou silasila faai'a o tai loloto i le silasila mamao i se auala e taoto ai le Faigamalo ma le Malo o Samoa i se filemu ia tumau le fealofaniga o Samoa aemaise le Maota lena. Atonu foi ua outou aumai se faataitaiga ina ia faamama ai mea ua fesopoai ai po o le sopoutu, leaga e moni lava le upu e auma le momo'o, ae a mavae le mataua ona toe vivii foi lea i le vevela ma le aasa o le la e pei ona aumai ma faataoto mai le lipoti. Ae faafetai i la outou tapenaga maea, o le tofa lena e to'a i ai le auamalulu pe a mavae matagivale. O le Tulafono e pei ona matamata i ai o le manaia ia. Malo le tofa fefulisai faalaa- mamafa ma le utaga oo. O le faataatia maiga o le Lipoti, ia o le agaga moni lea e toe faafoi Samoa i le mea sa sau ai lona mamalu i le va tapuia ma le va nonofo ai o Itumalo, o Nuu, o paega ma alaafaga leaga sa filemu mea uma e leai se vevesi.

Faafetai mo le tofa o lea ua toe faafoi aemaise Itumalo ua fetuunai ua leai se mamalu, ae o lea ua ou tilotilo i le vaega lea ua toe faafoi ai le atunuu i ona tulaga mamalu faa-palota a o Palauli la lea e le o aafia mai i la outou Lipoti, leaga o lea ua nonofo ma faanumera Palauli 1, 2, 3, a o Palauli o le Pule o le

Matua o la e silafia o Faalupega lava ia o Paia o Palauli ma lona Itu, ae se i faanumera 1 foi Palauli o le Pule a o lea ua aumai ua 3 Palauli.

O le tatalo faamolemole aveese numera ia, toe faafoi Palauli ma lona itu i lona mamalu sa i ai faamolemole. O le mataupu lea e pei ua tau umi ai le tatou fonotaga o le 10%. E i ai le manatu foi lea e pei o le upu e fai i folauga a le atunuu, ua faatutu foe o le savili ua sauni le fua e folau. O ai lava le sa e ae i fanua fai lona mo ia. Ioe, e ese le manaia o lea mea. O lea e aumai i le fuaiupu i le tou Lipoti ia tutusa alii ma Tamaitai i le Faiga Palota, o lona uiga e o faatasi a o le manaia ia. O ai a le tamaitai ua sao mai ma ofi mai lona sa o lona. O ai foi tamaitai ua le manuia, e faapena. E ese le faigofie o le auala faigofie lona nai lo o le saili o nisi mea. Ia o lea foi e tau maua atu e toe fau se isi Maota, ia o lea saga fai i fea e leai ni mea e fai ai? A o le mea moni lava lea manaia le mea lea, ia tutusa palota ia o faatasi le alii ma le tamaitai i Faiga Palota. A malo tamaitai ia omai. Afai lava la e uma ifo le Faiga Palota tele a le atunuu e 10 lava Tina ua saofaga o lona lava.

Afai foi e toalua, toatolu, toatasi, ia faamalie, o le faigofie ia o le auala e leai se faigata leai se vevesi nai lo o le mea lea e i ai nei e taumafai e faamalosi. Aua ne i o tatou taumafai e faataitai i atunuu i fafo, aua leaga o Samoa e mamala, e mamana, o Samoa e i ai ona paia e le soona tafoeina paia ma sa o Samoa, leaga e ave a le faamua i le alii po o le Tama o le aiga o le ulu o le Aiga. O mamalu lona o Samoa. Ae a tatou faataitai loa i fafo, ia o le mea la lea e tupu ona aumai loa lea ua ova atu sui o le isi Itumalo, toalua sui, toatolu sui. Ae a tatou o sao lava i le mea lea e ese ma le mamalu, filemu mea uma.

Ae pei o si faaopoopo atu lea i lea mea. O le vaega lea e tau palota foi lea e tele mea ou te fia talanoa ai, ae leaga o lea e i ai le avanoa mulimuli lau Afioga i le Fofoga Fetalai, e uiga i le mamalu ma le paia o le atunuu o alaala i fafo e aumai lo latou faatuatuaga ma lo latou naunau ina ia faatino le latou palota mo Samoa.

Ou te iloa o le a faapau i i sau tala afai e tele se avanoa mulimuli mai lau Afioga i le Fofoga Fetalai, o le a faapau lau tala i i ae mo le isi taimi la a auilili atu ia mea o lo o mafaufau ma manaomia e saga faaleleia ai le lipoti. Faafetai mo le lipoti e talia e le sui usufono lena o Palauli ia vaega uma o le lipoti. Malo le onosai malo saili. Manuia le Fono.

FOFOGA FETALAI: Malo sauna, faafetai mo lou sao aemaise foi o le fesoasoani mo Palauli. Ia lea ua faafofoga ma le manino le Taitaifono ma le Komiti. Mo le silafia e le toe i ai se isi avanoa i le Lipoti lena e na o le tasi lava lou avanoa, a uma lau 15 minutes ia pau lona.

O le mea lea malo mo lou sao. O le avanoa lena mo se tasi o sui usufono. Ia tulai mai le sui usufono mamalu mai Aleipata Itupa i Luga.

Afioga FUAAVA SULUIMALO AMATAGA (Aleipata Itupa i Luga): Faafetai i lau Afioga i le Fofoga Fetalai mo le avanoa. E manatu i lena itula o le a ta ta liu i lou sa e tusa ai ma le taeao ua sola. Ia e faafeiloai atu foi i le mamalu ma le paia o si o tatou atunuu o lo o faapea ona faafogafoga mai i le

Fonousu a Samoa aemaise foi o auaua paia a le Atua ma le maave eseese o lea ua e pai i ai ma o le a le toe oo foi i ai se faamatalaga ona o le manumanu i le taimi ona o lo o faatulagaina taimi e avatu ai ni motugaafa a sui o le Maota e tusa ai foi ma le Lipoti a le Komiti ua i lumamea.

Ia na ona ou faapai lava ma faatalofa i si ou itumalo i ona tulaga faalupe aemaise foi o matua faaleagaga o lo o faapea ona taputapu mai i si o matou itumalo i le Afioga foi i le Tama Sea aemaise foi o faafeagaiga taulagi o si o matou itumalo o Aleipata Itupa i Luga.

Lau Afioga i le Fofoga Fetalai, o se vaivaiga lenei o lenei itumalo e tusa ai ma le Lipoti a le Komiti. E avatu le agaga faafetai i le Taitaifono ma le mamalu o le Komiti ona o le tulaga o le tele o fautuaga ua aumai i le Lipoti a le Komisi ua teena, ae vagana ai nisi o fautuaga ua latou talia ma aumai ai foi latou fautuaga ia e 12 e pei ona atagia ai i totonu o le latou Lipoti.

E agai se faamatalaga muamua lava i nisi o fautuaga a le Komisi i le toe fetuunaiga lea o itumalo. Faafetai o lea ua faapea ona apo ma aumai e le Komiti, ma ua teena foi e le Komiti le tulaga lea i le toe fetuunaiga o itumalo. Sa ma auai ma lou uso a sui usufono mai Aleipata Itupa i Lalo, ma o se vaivaiga lea ona o le a toe fetuunai nisi o afioaga ma nuu o le Itupa i Lalo ae faaopoopo atu i le Itupa i Luga. Ae faafetai o lea ua faapea ona i ai le finagalo o le Komiti e teena. Ae o nisi o vaega e agai atu i ai se faamatalaga i le Lipoti a le Komisi, i le tau matau atu i le Lipoti, e pei e i ai ni tulaga foi lele o se Lipoti, o le tone o le Lipoti e pei o se Lipoti foi lele e tusia e se isi o lo o i ai se agaga ita. Ma sa faapea ona faaoo foi i le Komiti i le taimi sa oo atu ai lou sui usufono ma avatu ai nisi o tulaga, o lo o i ai faaupuga i totonu o le Lipoti e le tusa ai ma ala o le Tulafono. E i ai ni vaega o lo o tuuaia ai le Komesina o Faiga Palota sa i ai, e i ai le faaupuga “ua manatu e sui le fuainumera mai le 5 i le 6,” decided o le upu lea o lea e faaoga. E le o se decision na faia e le Komesina, o le faatonuga a le Tulafono e direct mai e le Tulafono le Komesina i le tulaga e tataua ona fai. Ma o lo o tele lava ia tulaga faapena i totonu o le Lipoti a le Komisi, ia atonu e faafetai o lea ua silasila i ai le Komiti i tulaga ia. Atonu o le tulaga foi lea ua tele ai ina teena fautuaga na aumai ona e pei e tau ese le tone o le lipoti a le Komisi. Ia ae sa tataua ona silasila o lea ua mae’a ona fai foi iai faaiuga a le Faamasinoga. O lona uiga sa tataua la ona tau tata’i i ai pe fai ni latou footnote e faapea “o lea ua fai i ai faaiuga a le Faamasinoga” ma atagia mai totonu o le Lipoti lea a le Komisi.

O le a ou la’a ese i le tulaga lea ae o le a agai atu i nisi o fautuaga a le tatou Komiti e tusa ai foi ma le lipoti. E iai fautuaga ia e 12 na tuuina mai. O lau iloa o isi fautuaga e avatu ai le teena a lenei Itumalo...

Afioga Hon Toelupe Poumulinuku Onesemo: Lau Afioga i le Fofoga Fetalai pe maua se avanoa.

FOFOGA FETALAI: Malie a le sui usufono mamalu se i tuu atu le avanoa i le faauilavea a le Afioga i le Minisita o Fesootaiga. Tulai mai lau Afioga i le Minisita.

Afioga Hon Toelupe Poumulinuku Onesemo: E leai se agaga e faalavelave i le saunoaga matagofie, ia ae leaga o lea sa saunoa i le tulaga o le Tulafono Faavae. O le tulaga la e i ai le Tulafono Faavae, o lea ua faimai e 5 ae ona o le upu lena e iai i talaane o le 10%, o le minimum, lea sa ala ai ona finau ma le agaga faaaloalo.

FOFOGA FETALAI: Se i tulai mai le sui usufono mamalu e faaauau le saunoaga.

Afioga FUAAVA SULUIMALO AMATAGA: Ia, faafetai masalo foi o se taimi o’o atu i ai sina faamatalaga e tusa o le faauilavea a le Afioga i le Minisita. Ae o le tulaga e pei ona avatu ai se faamatalaga, o lo o i ai vaega o le fautuaga a le Komiti, le vaega lea e 12 lea e agai i O’o ma Momoli. E pei e faitau atu i ai i le tulaga lea e le o manino mai i lo’u sui usufono, po o le tulaga pe teena, pe lagolagoina, pe o se mea foi lele e faavaelutai, pe taatia ai pea. Ia atonu o se taimi ona tali mai lea o le Taitaifono. Po o le mea ua aumai, fautuaina le aua le toe faia o ni O’o ma ni Momoli, ia pei o le tulaga lea, ona o lea na ona aumai ae le o manino tele i ai lo’u sui usufono i le faaupuga. Ia ae pei e manaia lava le saunoa manino mai o le Taitaifono i le tulaga lea ona manino ai foi lea o le faafofogaaga a le mamalu o le tatou Maota.

E i ai tulaga e fia faasoa atu ai i le tulaga lea o le 10%, ou te iloa ua tele nisi o sui usufono ua i ai finagalo aemaise foi ni tuualalo ma tulaga uma i le 10%. Ia atonu o i foi lea e agai mai ai le faauilavea a le Afioga i le Minisita. E i ai lava lou talitonuga, o lea e i ai faaupuga faapea i le Lipoti, ina ia filemu ma aua ai ne i vevesi le atunuu, fo’ia ai ni feteenaiga i le lumanai.

O le vaivaiga lava ia o le sui usufono o Aleipata Itupa i Luga, o lo o manino lava le Tulafono ae taumafai loa e mimilo i le mea o lo o manao ai le tagata ona i ai lea o feteenaiga ia. Lea ua alu a’i, alu a’i finauga na fai, lea ua aumai faaiuga a le faamasinoga ona o le upu lea o le ‘minimum’, manino a le minimum e i ai lona formula i le faa-matematika. E i ai foi nisi o sui usufono sa aumaia faapea mai mo mea o vaegamea tesimale, ae manino a le upu o le ‘minimum’. O lena foi e aumai i totonu o le faasamoa, ia le i lalo ifo o le 10%. O lona uiga a 5.5 e le i lalo ifo la o le 5.5. O lona uiga o lea tatou te talanoa i tagata, o lona uiga o le 6 le fuainumera lena e tatau ona i ai.

Ae ona o tulaga a ia, ae a tatou taumafai a e savalia Tulafono o lo o manino le Tulafono ua uma foi ona aumai i ai le finagalo o le Faamasinoga, ia o la e sa’o. O lea foi e i ai le upu lea faapea ‘presently at 5’, le taimi lenei na tusi ai le Tulafono ia o le 49 la e reference i ai, e talafeagai la le 5.

FOFOGA FETALAI: Ua ou manatu e faalavelave i le saunoaga a le sui usufono mamalu, ua mae’a Faamasinoga i tulaga ia. E le toe i ai foi se manatu tatou te toe fefo’ia’i. O le tulaga a ia o le mataupu pe talia le 10% pe le talia, o le mea lena o lo o moomia. Ae a tatou toe talanoa... ua uma ona i ai iuga a le Faamasinoga ma e tatou te le toe agai foi i ai ni a tatou saunoaga ma lou agaga faaaloalo.

Afioga FUAAVA SULUIMALO AMATAGA: Ia, faafetai lau Afioga i le Fofoga Fetalai, e tumu tele i le ava le sui usufono lenei i lau Afioga. O lea ua e saunoa ia e le toe o’o foi i ai se faamatalaga, ua manino faaiuga a le Faamasinoga ma ua manino ona faatulaga tulaga ia. Ia ae pei o se tulaga o lea sa i ai le faauilavea i le upu lea o le minimum lea na taumafai atu ai se faamatalaga. Ae ui i lea o le a ou se’e ese.

I le tulaga lava o le 10%, o lo o i ai nisi o finagalo tatou o pea i le mea lea e i ai nei, e tutusa lava alii ma tamaitai i le Palota. O la e i ai lava le tulaga lena i le taimi lenei. E sao lelei. E le o taofia ai tamatai e tauva i sui usufono ma alii, pau a si lala laititi lea, pe afai e le ausia e se tamaitai se Nofoa, 51 Nofoa 51 alii. A o le agaga lea e i ai i le 10% ia i ai se tamaitai i totonu, le toaono lea i totonu o le Palemene ina ia faamalieina le tulaga lea e pepese ai a Samoa, o le pae, o le auli, o le i’oimata. Ia ae uma ane, e leai se isi e ausia le palota. Ou te iloa o le agaga tonu a lena na ala ai ona taumafai i le tulaga lea, ia taumafai ina ia i ai ni sui Tamaitai e aumaia le leo ma le finagalo o tamaitai.

O lea foi sa faaalii ai nisi o finagalo o nisi i le tatou fonotaga talu ai, e i ai lava vaega taua, manaoga taua tau Tina ma Tamaitai e le mafai e alii ona faaleoa. A o le tulaga lena e ala ai ona tulai atu le sui usufono o lenei Itumalo e matou te faatauaina le 10% lea. A ua i ai se faiga palota... e i ai le mea o le probability e mafai ona tupu, e le tu mai se tamaitai i se isi Paeaiga, e 51 na o alii.

Ae pau lea o si afa o lo o tuu i le Tulafono e pipii mai ai tamaitai ina ia omai ai i totonu e faaleo so latou manaoga.

Tofa Hon Leatinuu Wayne Soialo (Minisita mo Pisinisi, Alamanuia ma Leipa): Lau Afioga i le Fofoga Fetalai...

FOFOGA FETALAI: Ia, faamalie atu i lau Afioga i le sui usufono mamalu, se i tulai mai lau Afioga i le Minisita o Pisinisi ma Alamanuia.

Tofa Hon Leatinuu Wayne Soialo: Ia ou te talitonu ua tele ni manatu e faaali i le 10%, ae ao lava ona faamanatu atu i le tatou fonotaga i lenei aso. Ia o au foi e fai ma ou faimalaga i fafo lau Afioga. O le toatele o i latou i fafo e le talanoa i se 10%. E aumai le latou moomooga ma faamanuiaga mo Samoa ona ua taitaia e se Tina Samoa, tina muamua ua avea ma Palemia, tina muamua ua avea ma Palemia i totonu o le Pasefika. O mea ia lea e faaviivii mai ai Samoa. Aisea? Ua faatau e Samoa Tina. O lea la e o’o mai le asō o lea ua tatou talanoa, fai mai, o le lē faatauaina, e telē le faatau lea e iinei i lenei itu. Ae peitai, ia e pau lava tou te le faatauaina le tulai atu o le Tamaitai Palemia o lo o i ai i le taimi lenei, lea e mafua ai ona i ai le tulaga lea. E pei na o se faamalamalama lea lau Afioga i le Fofoga Fetalai ina ia tatau foi ona manino ai le tatou mataupu.

FOFOGA FETALAI: Faafetai.

Afioga Leana Ronnie Posini (Safata 1): Lau Afioga i le Fofoga Fetalai..

Afioga FUAAVA SULUIMALO AMATAGA: Ia faafetai i le faauilavea a le...

FOFOGA FETALAI: E te faauilavea i le sui usufono lea e saunoa pe e te faauilavea i le saunoaga a le Minisita.

Afioga Leana Ronnie Posini: Lau Afioga leaga e ogaoga ia faamatalaga a le saunoaga a le Minisita.

FOFOGA FETALAI: Ia, se i i ai se taimi e i ai lou avanoa.

Afioga Leana Ronnie Posini: Ia faafetai, ona e faapea e le amanaia e lenei itu le Taitai o le Malo, e le taugamalie i le matou faalogo.

FOFOGA FETALAI: Ia, e i ai lou avanoa, lau Afioga i le sui usufono mamalu e i ai a le taimi.

Tofa Hon Leatinuu Wayne Soialo: Lau Afioga o le a ou le tali atu, ia ae se i tali atu foi i se taimi e... a! aua a na lagolago i ai e lagolago mai. Ae o le faalavelave e le o lagolago mai i le tatou Faigamalo i lenei taimi.

FOFOGA FETALAI: Ia, malie le saunoaga a lau Afioga i le Minisita atonu foi e i ai se taimi ona faamanino atili lea o le lagona foi o le agaga o le sui usufono.

Afioga FUAAVA SULUIMALO AMATAGA: Faafetai i lau Afioga i le Fofoga Fetalai, ona o le manumanu o le a uma lota taimi o taumafai atu lenei Itumalo.

Ia ae o le tulaga e pei ona saunoa foi iai le faauilavea a lou uso a Minisita, e leai e le o le tulaga lea. O le agaga lea e avatu ai se faamatalaga, pe afai e le i ai se Tina e sao mai le Faiga Palota, pau lea o le vaega. E pei ona fai atu ai se upu, pau lea o le afa o lea e pipii i le Tulafono ina ia saofaga se vaega o Tina e omai i totonu e faaleo so latou taofi. E tele a mafuaaga taua...

Afioga Hon Toelupe Poululinuku Onesemo: Lau Afioga i le Fofoga Fetalai pe maua se avanoa, faamolemole.

Afioga FUAAVA SULUIMALO AMATAGA: E pei o le tulaga lea e pei e avatu ai se faamatalaga ae o lo o faataua lava Tina uma aemaise o le Afioga i le Tamaitai Palemia o lo o taitaia le Faigamalo i lenei vaitau.

FOFOGA FETALAI: Ia malie ia, se i tuu atu le avanoa i le Minisita.

Afioga Toelupe Poululinuku Onesemo: Lau Afioga i le Fofoga Fetalai ua tau laga se lagona ona o le sui usufono o si o matou Itumalo, tele ia o matou

tuafafine, tulou le maota, e fia o i le Faiga Palota, a o le faaaloalo. O le fesili la i le sui usufono, pe faamamulu ese la pe a faapea ua fai atu se sui Tamaitai e fia tauva mo le tulaga lea o le faataua ma le agaga faaaloalo.

FOFOGA FETALAI: Ia, malie...

Afioga FUAAVA SULUIMALO AMATAGA: Lau Afioga, ia o le tali vave atu, e leai.

FOFOGA FETALAI: E pei o le a feteena'i le tatou mataupu o talanoaina, ae malie le... ia sui usufono mamalu o lea ua ou matau atu ua tau faaiuiu mai lau saunoaga, toe 2 au minute.

Afioga FUAAVA SULUIMALO AMATAGA: Ia faafetai. Lau Afioga ia o le tulaga lea o lea lava ta te matau atu a i luga i le uati o la e i ai nai o ta minute. Ae tali vave atu, e leai o lo o iai lava le avanoa tutusa o alii ma tamaitai e palota ai. Ae afai loa e le ausia ma le saofaga mai se tamaitai, ia pau lea o si vaega o lo o i ai le faitotoa lea mo tina ma tamaitai, ia ona agai mai loa lea i totonu tatou te nutimea faatasi ma faaleo mai e latou lo latou manaoga lea e le mafai e tatou ona iloa ma faaleo.

Ia faafetai, o le tulaga e agai atu i ai, i le tulaga i le tatou Faigamalo aua ou te iloa o le vaitaimi lea o Minisita le Afioga i le Tamaitai Palemia, sa faatulai mai ai le 10% lenei. O se tasi lea o pine faamau o le atunuu lenei o Samoa, sa avea ma pei o se fetu pupula i atunuu o le lalolagi, taulamua i mea lelei ma tulaga uma faapea. Lea foi na ala ai ona faatu le Matagaluega o Tina ma Tamaitai, vaega uma nei. O le taimi foi lenei i totonu o le Public Service, ua dominate e Tamaitai Faauluuluga o Matagaluega. O se laasaga, o se outcome lelei lea i taumafaiga na aumai ai e le faigamalo i lenei vaitaimi.

O lea foi ua saunoa nisi o tatou malo ia sa tatou faatasi ananafi mai Tasmania, o la e quote ai Samoa i le faatulaiina o le 30% o Tina i totonu o Initia. E tele foi nisi atunuu ua faataitai, taulamua Samoa si tamai Atumotu, ae tele mea ua tulai mai ma o se mitamitaga foi lea o tatou tagatanuu. O le agai atu i fafo i Fonotaga e ta'u ai Samoa.

O le Fonotaga foi lea sa fai i le 2014 i Samoa nei, ia lea i ai le igoa Samoa Pathway, po o fea lava la le augatupulaga e tau atu lava le igoa o Samoa la e i ai. Ia ma o tulaga ia e tatou te agai i ai, e le o faapea tatou te taumafai e sui i ni faiga mai fafo. E le i omai fafo fai mai ia tatou ae o le tofa lava a le faigamalo talu ai ona o le latou faataua i tina ma tamaitai.

FOFOGA FETALAI: Ua maea le taimi o le sui usufono.

Afioga FUAAVA SULUIMALO AMATAGA: O tamaitai o pae ma auli. O le manaoga o tatou, o le tatou faaaloalo i tina ma tamaitai. Ae ona o lea ua saunoa lau Afioga ua mae'a lo'u taimi, ae o se tulaga lena, atonu e maua se avanoa i se

isi taimi faamae'a atu nisi foi o motugaafa. Ia o la e faafogafoga si ou Itumalo, ia o le tatou sao lea, manuia le fonotaga, faafetai.

FOFOGA FETALAI: Malo, faafetai mo lou sao, sao o le Afioga i le sui usufono mamalu mai Aleipata Itupa i Luga.

Ia o le avanoa leni mo se tasi o sui usufono. Tulai mai le sui usufono o Vaisigano 1.

Afioga NIUAVA ETI L. MALOLO (Vaisigano 1): Faafetai i lau Afioga i le Fofoga Fetalai, manatu o lea ua mae'a ona tuvaofono le lagi aua le Tagaloamatua, le Atua foafoa. Ia o lo o ua faailo foi e le soaseu le lupemua aua le taitaiga lea ua sao ma uli ai le faamoemoe o leni aso.

E manatu e faatalofa aloaia i lau Afioga i le Fofoga Fetalai, Tamaitai Palemia, Sui Palemia, afioga i Minisita o le Kapeneta ae a le saofaiga o Minisita o lo o faalagolago i ai Minisita o le Kapeneta i la outou fautuaga.

E faatalofa i le Afioga i le Sui Taitai o le Itu Agai, aemaise foi o sui usufono mamalu o lo o agaia le tatou Faigamalo, vaeane foi le faafogafoga tapuai a le Afioga i Le Ao o le Malo ma le Masiofo, Sui o le Fono a Sui Tofia, Faamasino Sili ma le Ofisa o Faamasinoga. Ia e faatalofa foi i Ofisa Sili o Pulega o Matagaluega, lau Afioga i le Tamaitai Loia sili.

E faatalofa foi i le afaigaluega tofofi a le Atua o talafaauto aua le Atua ma Lana galuega e le gata i Samoa nei a o le Lalolagi atoa.

E faatalofa faapitoa isi o'u Itumalo o Vaisigano Nu.1, taeao manuia tele leni aso aemaise o le Fonotaga e tusa foi o le Lipoti e pei ona faataoto i le Laulau-a-Fono i leni taeao e masalo o se taimi o le a o'atu i ai se faamatalaga.

Ae faatalofa i Tama ma Tina matutua o si ou Itumalo o lo o ula foi le i'ula ma taputapua'i faiva o le ulufale ma le ulufafo o le atunuu aemaise foi o faiva o la outou sui usufono o lo o faapea ona filofilo ai i totonu o le tataga mamalu a Samoa aua le malae nei o le faautugatagi.

Ia tapuai maia leaga e taua le Lipoti e pei ona folasia e pei foi ona i ai le tatou Itumalo.

Lau Afioga i le Fofoga Fetalai ae lei o' se manatu e tusa ai o le Lipoti a le Komiti ou te fia faaleoina le agaga o le faafetai, faamalo i le Komisi aemaise foi o le Laulau-a-Fono o le Komisi e pei ona i ai le lipoti na mapu'e ai leni taeao.

I le matau lava ia ma le faitau auiliili a leni Itumalo ma lana usugafono i le lipoti a le Komiti e ese le matagofie i la'u lea faitau. E le gata e thoroughly lelei, lelei le tapenaga. O lo o aumai ai foi i totonu ni itu lelei aua le agai i luma o le tatou Faigamalo o lo o ua pale mai i le taimi leni.

E le gata foi i ina o lo o manino foi i totonu o le Lipoti ni lape ma ni itu foi na le atoa ai le tapenaga a lena foi Faigamalo ua mavae atu pei ona i totonu o le Lipoti leni. O le taua lea i lou lea usugafono ma lau matamata i ai i le taua. O lona uiga o fautuaga ma option e tele o mea o lo o aumaia i totonu o le lipoti lea a le Komisi, e tatau ona tatou tilotilo ma silasila lelei i ai le Maota leni. Pe a fua foi i le faataotoga o le structure o le Komisi leni, e moni ai, e le o ni

tagata foi e tuu maualaloina o tagata ua fai faailoga, o lo o lava lo latou iloa ma le faasoa na faapea ona aumai i totonu o le lipoti lenei.

Ae i ai vaega ou te le auai ai i totonu o le lipoti, ae i lau ia faitau mai le amataga o le lipoti lenei, e tele a mea taua o lo o faapea ona aumai ai na mafua ai ona lagalaga finagalo ma oo ai lenei lipoti i le Komiti.

Lau Afioga i le Taitaifono o le Komiti, matou te faamalulu atu, o le lagona o lenei Itumalo na fua i lana ia lea faitau ma o le lagona foi lea o le sui usufono o lenei Itumalo. Ae momoli le agaga faafetai i lau Afioga i le Taitaifono, Sui Taitaifono aemaise o sui usufono mamalu o le Komiti, e le faigofie la outou galuega, e tusa ai pei ona i ai lenei taeao.

O le mea muamua e fia oo i ai se tala a lenei Itumalo, o le tulaga e pei ona i ai la outou faaaloalo, tusa ai foi... Aua o le mea moni, o le Itumalo lenei o Vaisigano Nu.1 na muamua fofolaina le faava'a lea ma tatalo i se tofiga o Mati'a ma Mati'aituau i le pule a Vaisigano. O le mea moni, o le mea moni. Lea la na faalogologo le Itumalo, faafofoga foi Samoa i mau foi na faataoto mai e lagolago ai le mau lea ona o lo o i ai pule i Salafai o lo o faapea ona i ai le latou alaga faapitoa. Ae a Mati'a ma Mati'aituau? Ae a Safotulafai e pei ona lagolago ai le mau a Vaisigano? E le o lena. Peitai ina ua aumai le... lau Afioga i le Fofoga Fetalai ina ua aumai le mau a le Komisi o i ina la sa le talia ai e lenei Itumalo. O le fautuaga a le Komisi, sa tilotilo mamao po o fea le mea o agai i ai po o lilifa le lipoti e faataua le numera, pe lilifa le lipoti e faataua le Itumalo Faaalaalafaga. O i ina lea na aumai ai le lagona o le Itumalo. O le lagona o le Itumalo e momoli le faataua i le Itumalo Faaalaalafaga. O le mamalu o Puleono i Salafai ona e le o tutoatasi le pule lea a Mati'a ma Mati'aituau.

O le agaga la faafetai i lau Afioga i le Taitaifono, ona o lea ua aumai la outou fautuaga ma ua outou taliaina ai ma ua outou aumai faafautuaga. Lou Itumalo o Vaisigano Nu.1, toe tasi lava le sitepu o lea e totoe, tatou tatalo ia toto faamanuiaga i le Pulega Faatonu, o le sitepu mulimuli o lenei lipoti, ia to mai lo outou matupalapala e avatu ai lo outou tofi e pei ona finauina e la outou sui usufono. Tapuai mai, tatalo ma tatou anapopogi e aumai e le Atua. O le a le tau, o le a le tali e aumai e le Pulega Faatonu, ia o le tali lena mai le Atua.

Lau Afioga i le Fofoga Fetalai, ia o se manatu lea e tusa ai o le vaega lea a le lipoti e pei ona aumai ai i le Vaega 8 o le lipoti a le Komiti.

I le aotelega o le lipoti i le matau atu e ese le matagofie. O le tele o itu e tete'e ai le Komiti agai i le Lipoti a le Komisi, e interesting i le faitau ma e taua foi e lagalaga ai finagalo ma tau tilotilo ai po o fea o lo o taoto ai le equilibrium balance o lipoti ia e lua e maua ai manatu e fotu ai taeao aua le manuia o si o tatou atunuu.

Lau Afioga i le Fofoga Fetalai, na oo mai lea o sa matou faamatalaga ma o se manatu mulimuli foi lea. I le aotelega a ia o le lipoti a le Komiti...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, faamolemole pe maua se avanoa.

FOFOGA FETALAI: Ia, o lau Afioga e te i totonu o le Komiti, pe i ai se mea o faaletonu.

Tofa Hon Lauofo Fonotoe Nuafesili Pierre Lauofo: Ia faafetai lau Afioga, ona o lea e fai au faamaumauga foi nei i saunoaga, o au o le sui o le Komiti. Ou te le o manino atu i le equilibrium policy ea po o le a ea le igoa o le mea, se i faa-Samoa mai a faamolemole. E leaga e i ai le taimi e tali ai le Afioga i le Taitaifono ia ma ou lagolago atu foi i ai i le matou Taitaifono faamolemole.

FOFOGA FETALAI: Ia, manaia foi le fesili a le Sui Taitaifono e aoga foi i le latou tali.

Lau Afioga i le sui usufono mamalu.

Afioga NIUAVA ETI L. MALOLO: Lau Afioga i le Fofoga Fetalai ona o'ona mai lea o se manatu o lenei Itumalo i le vaega lea o le 10%. E i ai le talitonuga o lenei Itumalo, e talia e lenei Itumalo le faataoto lelei o le 10% lenei.

A silasila le mamalu o le Palemene, tasi lea vaega taua o le lipoti a le Komisi e ese le matagofie o le aumaiga faagasolosolo mai o options o lo o faapea ona aumai ai. Ae afai lau Afioga i le Fofoga Fetalai, o le tasi lenei o faamalu tatou te malu ai i lalo o Faigamalo Faatemokalasi. O lona uiga i le talitonuga o lenei usugafono, e tataua ona o tatou lagolago i le 10% lenei. Ae o le a le auala e fai? Tatou toe nonofo lelei i lalo, fai se auala e paleni lelei ai ma ia aua ai, ma malamalama le Tulafono ina ia aua nei toe tulai mai feeseeseaiga.

A o le taua pei foi ona tutulu foi i le Maota le Afioga foi i le sui usufono mamalu, e lagona, e lagona i tino le faataua, faataua le sao o Tina ma Tamaitai. E mafua i se a? Leaga e amata mai a i totonu o tatou aiga, e mafuta, mafua lava ma Tina, tolu loa aso e leai se Tina, ia e le iloa le mea e fesulua'i ai Tama. E i ai a tofiga, e i ai auaunaga na alai ona foafoa e le Atua e tataua ai ona faatino le vaega lenei.

O le taua ia o le vaiaso lenei i le faitauga a le Tusi Paia EFKS, o lo o faataua ai ia le tamaitai o Eseta. Na fia niuali foi Asuelu ia na manao e.... ua fai tauvaga tausala tamaitai, manao Asuelu se i aumai i luga ia Vasati.

FOFOGA FETALAI: Toe 1 ma le afa minute le saunoaga a le sui usufono.

Afioga NIUAVA ETI L. MALOLO: Fai mai e manao e avatu foi Vasati ia se i silasila le lalolagi i le lalelei o lona Faletua. O le a le mea na tupu? E le i usitai Vasati, lea loa la na valaau loa ia Eseta.

FOFOGA FETALAI: Onosai mai lava le sui usufono, se i tulai mai ia le Minisita o Galuega Tetele.

Tofa Hon Olo Fiti Afoa Vaai: Lau Afioga i le Fofoga Fetalai na ona fesili atu lava lau Afioga po o Matamua Vasati lea e refer i ai le lauga po o Vasati... O lea ou te fiamalamalama ou te le iloa.

FOFOGA FETALAI: Oi ia leaga o lea ua e ta'ua le Suafa Vasati a o lea e saofai Matamua, o le mea lea, ia faauma maia le saunoaga a le sui usufono, ua uma lou taimi.

Afioga NIUAVA ETI L. MALOLO: Ia faafetai. O le agaga lena. A o le aotelega e lagolago e lenei Itumalo le faataoto lelei o le 10% ina ia i ai se sao o Tamaitai ma Tina e aumai i totonu o lenei Palemene.

Manuia lau Afioga i le Fofoga Fetalai, manuia le usugafono a Samoa.

FOFOGA FETALAI: Malo saunoa i lau Afioga i le sui usufono mamalu, ia faafetai foi mo lou sao o lea ua faafofoga ma le toto'a le paia o le Maota.

Ia o lo o i ai lava lo tatou avanoa mo se tasi o sui usufono e fia saunoa.

Ia o lea ua matau atu pei a ua... Oi se i tulai mai le sui usufono, le Tama Matua, le Igoamatua ia Ale Vena, malo o lou taimi lenei.

Tofa ALE VENA ALE (Faleata 4): Faafetai i lau Afioga i le Fofoga Fetalai maua se avanoa o lenei usugafono aua le tatou mataupu ua i lumamea nei o le Maota. Ou te faatalofa atu i lenei taeao i le afio o lau Afioga i le Fofoga Fetalai, malo fai o le faiva, malo foi le tauatai aua le faatautaia o le tatou fonotaga, malo foi faatoatoa.

Lau Afioga i le Tamaitai Palemia, afioga i Alii ma Tamaitai Minisita o le Kapeneta faapea foi afioga i Minisita Lagolago, le paia o le Palemene i le afio o lau Afioga i le Sui Taitai ae faapea foi le maualuga o lena itu o le tatou Maota. Ia le tapuaiga foi a Ofisa Sili o Pulega o Matagaluga, soifua manuia le tatou Maota nei.

Ou te faatulou atu foi i le paia o le tapuaiga a le tatou atunuu aua le paia i Aiga ma latou Tama, o Tama foi ma Aiga, le Usoga ia Tumua ma Pule, Ituau ma Alataua, Aiga i le Tai ma le Vaa o Fonoti ae faapea foi Faleupolu o tofiga ma Tulatoa o Aiga. Le mamalu maualuga aua paia faale-Malo i le afio o lau Afioga i Le Ao Mamalu o le Malo faapea foi lau Afioga i le Sui o le Fono a Sui Tofia.

Lau Afioga i le Faamasino Sili faapea foi le Afioga i le Peresetene o le Faamasinoga o Fanua ma Suafa, le mamalu maualuga o Ofisa Sili o Pulega ae faapea foi tatou Atunuu.

Ae matua lava le tu'u i le paia o le tapuaiga i Faafeagaiga Taulagi, paia i Ekalesia Kerisiano uma o lo tatou atunuu o lo o faanonomanu ma tatalo ma tapuaia faiva o le tatou Palemene, aemaise o tatou o Faipule Faitulafono aua se manuia o le tatou atunuu.

Ou te faatalofa atu foi i le paia o si ou Itumalo Faleata Nu.4. Lau Afioga i le Fofoga Fetalai e avea lenei avanoa e fia momoli atu ai le agaga faafetai lou Itumalo o Faleata 4, le afio o le Alo o le Tuitoga faapea foi le fale o Sataalua ia Lauaki ma Motuopuaa, si ou nuu foi o tau Toamua i le afio o Ale ma Ulu ma o la Aiga ma le gafa o Seatoe le itulua o Sa Tunumafono.

Lau tofa i le Vaaulu na falelima ai aiga e fa o Faleata. Ia e faapea foi paia i le tapuaiga a Tama matutua ma aosinasina o le Itumalo, paia i Faafeagaiga taulagi o loo tau asuina le ipuvai o le ola aua totonu o si o matou Itumalo. Ou te momoli

atu ai le agaga faafetai tele e tusa ai ma le faiga filifiliga o le tatou Itumalo, tatou Faiga Palota ua tuanai atu. Malo faafetai, e le mafai e ni au upu ona faamatalaina le agaga faafetai i lo outou finagalo e tusa ai ma lou manaoga ina ia ou faasee atu i le Faigamalo Faatuatua i le Atua Samoa ua tasi.

Faafetai Faleata, faafetai i lo outou lagolagoina o se manatu ia te au nei, le paia e o le tatou nuu, ua tuanai Apolima o le tatou Faiga Palota, faiga filifiliga o le tatou Itumalo, lo outou aiga Sa Ulu, afifio mai e faaauau le tatou faiganuu, aua; o a nei au, ae a oe taeao. O a uma mea, lafoga matuia, o a uma lava tulaga uma i le taimi o le Faiga Palota ua uma na taimi.

O le mea a lea na afio mai ai Iesu i le Lalolagi lenei, ina ia outou fealofani le tatou nuu, omaia e fai le tatou nuu magalo uma mea uma, silasila mai le Atua. Ia manuia tele le tatou.... tapuai maia ma le manuia Faleata 4, e leo toe umi foi le taimi totoe o lenei Paeaiga ia e taumafai atu.... toaga e faasoa uma miliona lea ua alu atu. Lea ua uma na tufa le vaega mulimuli lea o le tupe lea sa taofii nei tei ua faapea ua fai ai ni au campaign.

O lea ua uma atu, lea ua fai tatou lipoti, audit report, alu atu ma le isi miliona 2023, 2024. Ia talitali mai le manuia lea la a alu atu 2024, 2025, 2026, manuia na o le tatou Itumalo, lau Afioga i le Fofoga Fetalai ou te fia tautala i le lipoti....

FOFOGA FETALAI: Ua ou vaelupeina le saunoaga a le sui usufono mamalu mai Faleata 4, le Igoamatua. O le measili ona taua lea ua e pai i lou Itumalo. Oa foi mea ua tutupu, sa tutupu, o lea ua faafofoga ma le totoa le Itumalo i lou finagalo ia teuteu ma faalelei le Itumalo, ae alo i luma lo outou Sa aua le manuia o le Itumalo.

Ae talu ai ona ua tatou taunuu i le tatou taimi malolo, ia maua se avanoa pe a avatu le soifua o le Maota a taeao e faaauau ai le saunoaga a le sui usufono mamalu. Ae tatou sailiili malosii aua le tatou aso fono foi i le aso a taeao, momoli atu le faafetai tele i le paia o le Maota i lenei aso, faamalo le usufono, faamalo foi le onosai i lo outou sao, nisi ua sausaunoa lenei aso lea ua faamauina lo outou sao.

Ae tatou tatalo soifua le aso fono a taeao faaauau ai foi outou finagalo mo le talanoaina o lenei lipoti. Na o se faamanatu a le Nofoa o lea foi pei ona maua ia outou saunoaga. O loo tatou faamanatuina pea tatou teena o le sauaina o tina ma tamaitai, e moomia foi le tatou toniga uliuli mo le aso a taeao e faaali atu ai ia i latou le tatou teena. E tau solomua i Taitai o le atunuu ona tatou tausolomua i lea tulaga ma le agaga faaaloalo.

Na tolopo Taulumaga a le Fono Aoa Fautulafono i le itula 1:08 i le afiafi seia aulia le Aso Tofi, 26 Oketopa 2023 i le itula e 9:30 i le taeao.